

佛山忠義鄉志卷十二

金石志上 金石

省志金石不載前明不勝載也若吾鄉則靈應
祠內鐵鏡鐵瓶號爲古物而無款識佛山石榜刻
於貞觀陳志所遺而十年前已佚唐石僅于履揖
等三碑移自陝省五代經幢亦非鄉物其餘皆明
以後修廟宇紀園亭之石耳撰者未必盡爲可傳
書者未必盡能合法名式體例亦未必悉遵漢魏
韓柳之文顧地限一區例應寬採茲彙而錄之并
及筠清館所刻自晉迄元名人法帖六卷定武蘭
亭叙一卷以俟後人采擇後之視今亦猶今之視

913.743
2522
6

昔安知陂陲林立不由此與年俱古也志金石

金

年代無考
玉附

鐵鏡 靈應祠古器鑄造不可考久藏祠中頑黑

無色蓋千年物也明嘉靖中築祠前照壁出此鏡
懸之則光芒四射不可逼視遙望寶氣騰躍若有
神寓焉俄隣鄉以鏡能遠照驚眩不安遂仍還之

祠中

陳志

鐵瓶 靈應祠養花瓶也高五尺鐵質製極古樸
當禦黃蕭養賊黨時鄉人取以誑賊賊遙見疑爲
大礮不敢逼噫瓶能却賊瓶真寶也哉

陳志

小莒刀黃朝珣家藏朝珣妻吳氏將生氏父遇一

道人贈以此刀曰是大錢爲君喜徵至家而氏生
因以與之長携莒刀歸朝珣家生子三長昭漢附
生次光漢武舉三廷槐按察司知事黃家以爲吉
祥世守之

鐵浮圖高一丈六寸重一千八百餘觔潮省和尚
祈舍利回建此塔於經堂以藏之至敬來和尚重
建

鐵鐘在丁氏祠堂新會陳獻章撰銘銘曰出佛山
冶入濟陽堂厥聲鏗鏗震于無疆

玉帶計玉片二十塊每塊厚二分潔白光潤明徹
照人工作精古歲久之物也 靈應祠神所繫村

尾梁姓施送

圖



此塊橫四寸半

此塊橫六分

以下三塊俱橫六分

此塊橫六分

此塊居中橫二寸一分俱高寸六分

此塊以後尚有五塊照右邊式

大小共二十三塊



共七塊

每高寸六分

每橫二寸二分

石

唐

佛山橫榜八分書二字在普君墟貞觀年間刻

于履揖墓誌

開元十五年正書

口口口州虜施縣令上柱國于公墓誌銘

兼序

口口口恭字履揖其先東海人也漢太守定國之
允洎五代祖謹仕魏遂居河南今卽河南人也績
著前史慶貽後裔曾祖宣道隋左衛率皇涼甘肅
瓜沙五州諸軍使涼州刺史成安子祖永甯皇商
州刺史增建平公父元祚皇益州九隴縣令襲建
平爵尙德靜縣主公卽主之次子也公言行周密
風儀閑雅弱冠以諸親出身解褐授好時縣尉初
大周御宇分邦制邑劃爾畿甸粦爲稷州選部甄
才擢授斯職亦當時之榮選也自茲已降累遷郡

邑尋贄臨穎復典膚施關右馳聲許邦思惠非此
能備也開元十四年春天子若曰縣令在任清白
者選日擢用公卽隨調選方俟遷陟命何不融疾
成不治以其年秋九月戊戌卒于私第春秋六十
有六時來不偶其如之何夫人譙郡戴氏妍妙凝
華貞順勉行自承饋盥克諧琴瑟降年不永雖恨
偏沉同穴相期果然終合開元十五年七月乙酉
權祔京兆神和原禮也拱樹蕭蕭坐看成古佳城
杳杳空見微月嗣子弼嬰等泣血崩心絕漿茹蓼
昊天莫報長夜不曉慮陵爲谷刊石爲表銘曰
死生有數晝夜不捨嗟彼于公長歸地下高墳峩

峩宅此崇阿千秋萬古孰知其他

韋妃墓誌

建中三年正書

唐故韋妃墓誌

六字蓋石上大楷書

大唐涇王故妃韋氏墓誌銘序

給事郎行河南府洛陽縣丞翰林學士賜緋魚

袋臣張周撰

夫必有婦其尙矣先務德禮次求容功兼而有之
方謂盡善不尔則不足以侍執巾櫛宜其室家故
詩稱好逑傳著嘉偶非必獲是孰媿名王妃姓韋
氏蓋京兆長安人祖湜皇朝中散大夫穎王府司
馬贈光祿卿父昭訓皇朝中散大夫太子僕贈衛

尉卿皆公望自遠吏才兼優來以何暮見歌去以
不留興詠妃卽淮陽府君之第四女也自漢及今
門爲望族男不卿士女則嬪嬙蟬冕魚軒與時間
出騰光簡謀昭晰紛綸妃蕙以爲心馨其如菑詞
懿而定服純而衷位則千乘小君行則一人猶母
雖貴無壽命也如何嗚呼享年四十八以建中二
年十二月己酉薨于寢以三年二月庚申葬于原
禮也存不育男孕女沒無主祀執喪有足悲夫銘

曰

關右著姓海內名家氣與蘭馥顏如薜華宜乎作
嬪于王之室如何不淑中路先畢松檟交植塗芻

共來一晝朝露千秋夜臺目覩原野心傷口口日
既光沉人亦薰歇中無可欲焉慮發掘但恨長辭
獨歸城闕

按唐書涇王倓肅宗子始王東陽至德二載進
王涇史思明陷河洛詔充隴右節度大使興元

元年薨子迨延德郡王妃韋氏鄭公房祖湜父
昭訓並見宰相世系表湜齊州刺史昭訓太子
僕與志詳畧互異漢丞相韋賢自鄒徒杜陵至

唐時定著九房宰相十四人太宗妃生紀王慎
肅宗妃生充王儻者皆韋氏又開元二十四年

爲壽王瑁聘韋昭訓女卽妃姊

見元宗貴妃楊氏傳志所

謂自漢及今門為望族男不卿士女則嬪嬙也
穎王璈元宗子百官志正五品上日中散大夫
王府司馬從四品下光祿寺卿從三品太子僕
從四品上衛尉寺卿從三品建中二年妃年四
十八則知生于開元二十二年其薨先涇王三
年志云存不育男孕女則知道非妃出也張周
見韋執誼翰林院故事建中已後周自洛陽尉
改河南縣丞又改兵曹又改虢州司馬皆充翰
林學士丁居晦重修承旨學士璧記張周大歷
十四年自洛陽縣尉充建中二年改河南府兵
曹叅軍興元二年除虢州司馬依前充今結銜

作河南府洛陽縣丞與執誼居晦所記可以互
證給事卽正八品上此石與于履揖劉峯二碑
嘉慶二十五年里人吳榮光得于西安今在吳
大樹堂內筠清館

劉峯墓誌 大和八年正書

唐故楚州兵曹叅軍劉府君墓誌銘 并序

進士景炎撰

公諱峯字子嵩望美彭城家寄京邑曾皇祖禰德
行咸高仕位佳政屬干戈亂動告牒失遺畧而不
言公青春懷橘白面凌雲出事公卿奏成品秩解
褐任洵陽縣丞才繼陸安政敷五德次任寧國縣

丞上司勒留下士遠慕雖不親臨百姓第亦播顯
多能三任楚州兵曹位亞題輿道益能軾館驅事
集戎旅獲安公累任清肅上考成高 有殊

何壽年不永太和八年七月一日遊懷德私 享

年六十有二仁兄悲切痛失鵠原哲弟浦陽縣尉

職 支不復同衾邠堪異鄉夫人趙氏頓罷

鼓瑟 哭 容德繼敬姜聲齊孟母嗣子歡郎年

未 美少孤上維號天未能主葬女三人長

適楊族次居 在 非 親戚慘愴實亦

行路悲傷子婿楊氏 報 泰山之恩淚送逝川

之落室又泣血難報罔極 誌石弘農意焉以

大和八年十一月廿六日葬于長安縣

鄉窀

窆禮也恐陵谷遷變乃刻爲銘辭曰永壽楚楚劉君刀筆凌雲于難繼善政易聞兩贊大邑一椽理君身歿名揚不朽蘭芬棣萼斷腸孀妻晝哭雅合更榮如何不祿墳起曠野殯毀華屋天然崗長埋片玉長女佳壻祖奠潛然下淚卽日霑恩早年安魂紀德萬古稱傳

五代

南漢陁羅尼石幢

乾和三年正書

加句靈驗佛頂尊勝陁羅尼

曩謨婆誡疇帝一怛嚩路枳也二鉢囉底尾始瑟

吒野^三 沒馱野 口口口口 但你也他^五 唵尾戎馱

野尾戎馱野^六 娑摩娑摩 三滿多 嚕婆娑娑 口口

口頗囉拏誡底 口口口口 口口口口 婆嚕尾秣第^九 阿鼻

誑左覩谿 口口口口 口口口口 囉嚕左曩^{十一} 阿蜜唵

多鼻曬矧^{十二} 阿賀囉阿賀囉 阿欲散馱囉梘 口口

戎馱野戎馱野^{十五} 誡誡曩尾秣第^{十六} 口瑟柅灑尾

惹野尾秣第^{十七} 口口口口 口口口口 口口口口 口口口口

口口口他誡多^{十九} 嚕盧謁^{二十} 娑 口口口口 口口口口

口口口口 口口口口 口口口口 多纈哩馱野^{廿三} 地瑟姹曩

^{廿四}地瑟耻 口口口口 口口口口 口口口口 口口口口 口口口口

賀多曩尾秣第^{廿八} 薩嚕嚕囉拏 口口口口 口口口口 口口口口

尊勝心陀羅尼口口口謨三舅多口口口娑嚩
口口口口口口口口口口心陀羅尼口口謨
婆誡口一耶瑟拏灑二惹野覩三嚩羅毗惹野四

口口口口口口口五

口口和三年太歲乙巳二月口口日口口口口
陳十八郎敬口造加句佛頂尊勝陀羅尼幢一座
追薦幽途故悞物并乞自身口口口口長於口
口口口禪院供養設齋處讚記

按乙巳為南漢主劉晟乾和三年此幢末紀年
和字上當是乾字石在吳氏筠清館

明

重建祖廟碑記

祭法曰法施於民能禦大災大患則祀之觀此則
佛山之民崇奉祖廟不妄矣廟之創不知何代以
其冠於衆廟之始故名之曰祖廟所奉之神不一
惟真武爲最靈其鼓舞群動捷於桴鼓影響莫知
其所以然當元季時群盜蜂起有龍潭賊勢甚猖
獩熾艦於汾水之岸欲標掠鄉土父老求衛於神
是時天氣晴明俄有黑雲起自西北須臾烈風雷
雨賊艦幾盡覆溺境土遂甯鄉有被盜者叩於神
盜乃病狂自賫所竊物歸其主復有同賈而分財
不明者矢於神其昧心者卽禍之其靈應多類此

洪武間鄉耆趙仲修重建祠宇緣卑隘無以稱神
威德宣德四年己酉士民梁文縉等廣其規模好
善者多樂助之不終歲而畢丹碧焜耀照炫林壑
復與洗灑通率衆財買廟前民地百餘步鑿池植
蓮號曰灌花池由是景槩益勝塘之稅文縉佛兒
分承輸官其崇奉可謂誠至矣衆請記其事於石
余謂神之像乃土木爲耳無言語可聞號令可畏
而能使強戾者不得肆其暴昧心者不得遂其奸
記謂法施於民能遇大災大患者神豈爽乎哉民
之崇奉宜矣噫世之都高位享厚祿以保民爲已
任者求如神之爲何不多見耶此陸龜蒙所謂纓

弁言語之土木視神之爲可不發愧而以善政自勵者歟文縉等所以勤勤懇懇而新是廟者蓋亦藉神之靈化人使咸歸於善耳厥志良可嘉也遂書於石俾後人知所崇奉云

宣德四年己酉邑人唐璧撰

慶真堂重修記

蓋聞天地之間道爲最大三才之內人爲最靈故聖神之德有以合造化致中和位天地而育萬物各得其所體物甯得而遠之乎恭惟元天上帝太陰之化水位之精職居四聖之中威鎮九天之下剪除妖怪迅秋令于雷霆快護善良沛春恩于

雨露有求皆應無願不從本堂奉事香火世世相
承建基之初不知何代也似爲冠一鄉衆廟之始
名之曰祖堂自前元以來三月三日恭遇 帝誕
本廟奉醮宴賀其爲會首者不惟本鄉善士抑有
四遠之君子相與竭力以贊其成是日也會中執
事者動以千計皆散銷金旗花供具酒食笙歌喧
闐車馬雜遝看者駢肩累迹里巷壅塞無有爭競
者豈非致中和之效乎大德之間廟前有榕樹二
株被風吹頽鄉人聚以二百餘衆扶立不動是夜
忽聞風雨聲次早樹起而端然豈非聖神之德驗
乎名之曰聖榕元末羣盜蜂起時有龍潭賊來寇

本鄉艤船數十艘於汾水之岸鄉人啓之於神是時天氣清明俄有黑雲起自西南旣而狂風暴作飄賊船於江之北覆溺者過半望見雲中有神人披髮方知 帝真救民於急難之中驅賊於水火之際有此顯現後元祚將移 神亦昇天矣賊乃買致守廟僧用暈穢之物竊污神像遂入境剽掠而廟宇聖榕俱爲灰燼守廟僧不數日亦遭惡死迨我聖朝混一天下民安其生有鄉老趙仲修等節次抄題重修廟宇忽於小橋浦見水湧隨卽一木躍出於淤泥之中濯如也衆以爲神稽之父老傳言其木係是創基之初雕塑神像之餘不敢毀

以他用是用藏之迨夫歲久而失其踪也今顯出

豈非神現而用之乎遂命良工雕刻聖像如

故以奉事之祈求雨暘時若百穀豐登保佑斯民

以迄於今矣緣其棟宇卑狹未足以稱神光宣

德四年己酉鄉之善士梁文縉出為主緣化財重

建其趨事赴工者不厭不怠經之營之畢年成之

起工之夜廟前現一火球大如車輪滾於地上光

徹遠近倏然不見監柱之日化緣中有不潔神

責其傅匠者以言其過庚戌之秋九月朔日曙色

初分之際廟前現一神旗風烟颯颯初濃漸淡隱

隱不見丁巳歲六月十有七日現一白蛇蜿蜒之

狀往來於棟梁之間鳥雀驚喧觀者漸衆遂隱於
藻稅不見如此者皆神光不測之妙也何其盛歟
矧茲廟貌隘塞無以闡其勝覽正統元年丙辰歲
主緣梁文縉等各出已財買到廟前民地一坵以
步計之一百二十有五鑿爲灌花之池植以波羅
梧桐二木於餘土之上其地稅糧則有梁文縉霍
佛兒分承在戶以輸納之冀千載之下無以侵占
永爲本堂風水之壯觀也噫積善之家必有餘慶
積不善之家必有餘殃豈不信哉近因隣境有無
知者妄借神繖以爲競渡之戲灾害隨至悔何及
也鄉間有被盜者旦夕來 神前禱告而賊人陰

懷畏懼脩省之心遂生無妄之災將財物以歸其
主也又有同生理而財物不明誓之于神其瞞
昧之人皆有惡報以此明彰昭報者非一難盡枚
舉姑書此以記之

正統三年春二月花朝前一日化緣口口口立

靈應祠田地渡額事記

目四十一條見
祀典門

嗚呼莫爲于前雖善弗彰莫繼於後雖美弗傳是
祠之建肇宋元豐禦災捍患賜額褒功瞻彼神明
赫赫厥靈顧彼前脩創造惟周祠成績著刻木傳
流閱厯歲久慮其頽朽正德癸酉貴等會首竭力

構材煥然重修流芳堂建爰及牌樓灌花池飾寒

林所就六房改造三門新構廟貌增光輝映宇宙
松柏森嚴四時擁秀永期壯觀民安物阜噫前之
開惟今之繼實先後之用心若是咸欲傳之悠久
而有徵耳述前繼後端有望於後人也歟

大明正德八年歲次癸酉孟冬吉日撰跋霍球會
首霍時貴捨石霍珪書丹陳諫篆額張愷祠道士

蘇澄輝

祖廟靈應祠碑記

南海縣佛山堡東距廣城僅五十里民廬櫛比屋
瓦鱗次幾萬餘家習俗淳厚士脩學業農勤耕稼
工擅爐冶之巧四遠商販恒輻輳焉境內神廟數

處有所謂祖廟者奉眞武上帝像因歷歲久遠故鄉人以祖廟稱之水旱災沴有所祈禳夙著靈響一鄉之人奉之惟謹大明正統十四年己巳秋海賊黃蕭養初以行劫禁錮越獄亡命有司緩于追捕遂糾合惡黨剽掠村落擄貲貨焚廬舍迫脅兵民從之爲逆弗從輒殺之聚其烏合之衆以數萬計舟楫塞川攻圍廣城而南海番禺諸村堡多有從爲逆者聲言欲攻佛山父老赴祖廟叩之于神以下來否神謂賊必來宜蚤爲備于是耆民聚其鄉人子弟自相團結選壯勇治器械浚築濠塹堅木柵周十許里沿柵置舖凡二十有五每舖立長

一人統三百餘衆刑牲歆血誓於神曰苟有臨敵
退縮懷二心者神必殛之衆皆以忠義自許莫不
慷慨思奮居無何賊果率舟數百至而其比隣村
堡從逆者皆視佛山爲奇貨破之則大有所虜獲
以充其欲是以四面環而攻之者晝夜弗休每當
戰父老必禱于神許之出戰則戰必大勝斬獲不
許則嚴兵防守不敢輕出賊夜遙見柵外列兵甚
盛有海鳥千百爲群飛噪賊舟上又見飛蚊結陣
自廟間出飄曳空中若旗幟形賊屢攻而屢敗之
獲賊首級千數百計賊又造雲梯臨柵阻于溝塹
不能前却衆擲火炬焚之賊計窮無如之何遂退

兵二里許聯舟而營意將久住俟柵內食盡人憊
不攻自破矣然佛山大家巨室藏蓄頗厚各出糧
餉資給人皆飽食無慮賊中有自恃勇悍翹足向
柵嫚罵者柵內火鎗一發中之卽斃凡若此者鄉
人皆以爲神助也賊雖不復敢攻而相持累月弗
退景泰改元四月十一日黃蕭養被擒就戮于廣
城賊聞之一夕散去蓋佛山爲廣城上游足爲聲
援佛山失守則廣城愈危其所關係豈細故哉賊
平後予與僉憲淮陽宮公安同出諸處村落招撫
民之被寇流散者俾還復業因過佛山見其濠塹
木柵與凡戰艦俱完然在召其父老而獎勞之父

老述神明靈應事甚詳悉予與宮公往謁祠下再
拜瞻仰嗟嘆久之諸父老請予爲文記其事以示
來世子歸而言於方伯揭公稽旣而公以佛山耆
民能保護境土及真武靈應疏聞於朝命下覆實
而父老復詣予請記甚勤義不可拒因曰真武上
帝昔我成祖文皇帝崇奉極其隆重建武當宮觀
至今選廷臣往彼護視罔闕而普天之下士庶之
家奉侍是神者在在有焉然其感通或有不同者
何哉蓋在誠心之至否何如耳大抵動天地感鬼
神不過一誠而已有其誠則有其神無其誠則無
其神此理之自然也書曰至威感神詎弗信乎惟

爾佛山一境民庶之於祖廟莫不極其嚴奉其來久矣比劇賊臨境又能傾心叩禱厥誠不亦至乎神烏有不感通者哉宜乎靈應昭昭如是非偶然也且夫叛寇罪逆滔天荼毒生靈人神共怒朝廷命將以大兵四集賊尙不量力度勢自來送死安知非神明欲其亟亡而使之然耶嗚呼夫彼各鄉從叛黨類其父母妻子今皆安在而佛山一境晏然無恙室家相慶父子兄弟鄉黨族媯歡好如舊共享太平視彼作惡者相去豈特霄壤之懸絕而忠義之美名將亘古而不息矧諸父老殫心竭慮保全境土未常有德色希望之心而勤勤切切惟

欲表彰神明之休烈以昭示遐永若此者皆可嘉也因為備書而詳錄之俾後之來者世世嚴奉無有懈怠則神亦福汝庇汝於無極矣請文立石者民名氏列之碑陰是為記

會稽陳贄撰

河南按察司僉事五羊趙純篆額

廣西賓州知州南海鍾順書丹

景泰二年六月立

梁節婦霍氏墓記

嘉靖元年秋湘厓子承提學魏公委以毀淫祠建社學敦尚風節於廣之佛山至之日如命事事論

民意指父老曰鄉人梁能妻姓霍氏節婦也使君欲聞其槩與節婦念一乃歸不半載厥良客死湖州計居室十有八月遺腹生梁商躬紡績以撫教其成事衰姑克執婦道姑死依外氏孀處四十年初晚一節六十四歲以終湘厓子曰是可嘆矣余其尚之頃之鄉士大夫云云如前且曰吾徒幾欲暴之而中沮於物議謂文移動覆勘之擾牌坊費里甲之措也未舉坐此湘厓子曰是又可嘆矣余當聞之頃之里族狀狀亦如前且曰節婦歿子亦繼亡弱孫梁聰弗能營葬者閱四載矣湘厓子曰是又可深嘆也余爲掩之時卽往其廬顧節婦之

棺置於外氏之寢門子商之棺橫於鄰室之幕次而弱孫梁聰者窮而無所歸也嗚呼所聞難忍聞矣所見甯忍見耶奈何人事天道變改不符有如此微我魏公風教之崇物色之及則節婦身後之名幾不著矣然停棺數年而不克成葬抑豈有待而然耶霍有兩生曰暘曰敦者義於氏願以先塋之西吉壤厝之而別厝梁商於他所又自請以董葬事湘厓子授以葬具七日而墳成以所毀淫祠之木石改而亭之揭石大書表其貞節筐以特羊匹帛而祭之以文復爲傳以鳴之庸敷魏公之意而出公入之財湘厓子不得而與也節婦不可謂

不遇矣由節婦之事觀之則知賢人君子自求已志而不見知於人者世固未嘗無也間知之而不能汲引之顧從而違之俾不通厥事大率類此吾於是又重有所感也世無後材之文則可以彰仲舉之義獨恨才慚野史文不足以彰之則節婦雖遇猶不遇也噫是碑豎於祖廟舖大塘前墳亭之西向草蔽其面土掩其半幾成廢朽余命工人剷草木去泥土滌其污垢乃錄出付諸梓使後世不獨知其人與文爲不朽並知其墓與碑之所在雖有豪強必不起狼貪之心而奪占之矣

嘉靖元年提學魏校委教諭蔣整治葬

陳志

四社學記

吾鄉故有社學四焉蓋督學莊渠魏公所毀諸淫祠改建者也是時崇本務實教化興行風俗改觀人才輩出余時尚少列諸生歌詩習禮今猶能記憶其盛自莊渠公去後教化不修社學且廢二十餘年矣嘉靖庚子婺源覺山洪公巡按我廣慨然以風俗爲已任查復各郡邑社學學憲西洲歐陽公郡守西村胡公奉行惟謹吾鄉社學遂復脩焉社學師俱由郡守選經明行修者充之其教先德行而後文藝士習彬彬然可觀矣先是社學扁額不存覺山公乃取義命名因方立教曰蒙養示養

也曰敦木示立也曰崇正示趨也曰厚俗示風也
是故果行育德則蒙養端履忠居信則本立固釋
回反經則趨向正隆禮由讓則風俗淳於以作聖
入神崇德廣業此其大務也然則社學之設豈徒
階利祿已哉余懼人昧諸公作興意也故爲記之
冀與諸君子勉焉嘉靖辛丑九月日記泚桂奇撰

世濟忠義記

余嘗稽古之人所以制大敵弭大難未有不因甲
兵據險塞居得意之位操能致之權者及其論功
於朝則必晉殊秩膺顯號銘之旂常藏之金匱石
室死則廟而祀之不以爲異其有功不受賞者蓋

寡惟夫禍變起於倉卒而當其時與地無甲兵之
援無險阻之限而又無得意之位能致之權彼豪
傑者出其間不忍坐視其危莫之救徒以其忠義
之所激發能使阡陌耒耜之輩奮而爲精兵而大
敵破咆哮嘯聚之徒化而爲良民而大難平其成
事之難槩夫有所憑藉者功相萬也若此者不尤
偉歟然而有司不以表揚朝廷不以入告不得論
功於朝卒與閭巷之人同湮滅不見况敢希榮寵
崇廟祀流聞當時聲施後世哉自余所覩聞者則
余所見之南境曰佛山百餘年來兩遭變亂而亦
莫不有豪傑之士共濟艱難者出焉人才之不必

取借於異代異地亦明矣正統十四年黃蕭養作
亂爲嶺南患聚黨數萬人樓櫓二千艘攻城掠地
僭號稱制張官置吏所過之地屠僇殆盡則佛山
之父老若梁廣梁懋善霍伯倉梁厚積霍佛兒倫
逸森梁濬浩洗灝通梁存慶何壽凱洗勝祿梁敬
親梁裔堅倫逸安譚履禎梁裔誠梁顥梁葵頰洗
光何文鑑霍宗禮陳靖者二十二人度賊且至首
倡大義罄貲財樹木柵濬溝塹儲兵械一夕而具
蓋若神所助焉賊至則供具酒食以勞敢戰之士
不避鋒鏑爲有衆先飛鎗連弩以摧其陣車鎔鐵
水焚其皮帳奇謀迭出斬其僞將彭文俊梁昇李

觀奴生擒張嘉績等前後斬首二千餘級無亡矢遺鏃之費而黃賊已困矣由前所云無甲兵之援險塞之限徒以忠義之所激發能使阡陌耒耜之輩奮而爲精兵而大敵破者非此也耶左布政使揭稽上其事於朝而當事者歸之真武之神名其鄉曰忠義鄉而二十二人之功不與焉此余之所聞者也嘉靖三十年山東淮徐皆大稜嶺南尤甚道路死者相枕籍蓋因年穀不登賦役繁多財力詘乏人無餘蓄有司限民平糶法非不良也頑悍之民從而挾取之而剽掠之釁啟矣佛山尤地廣人衆力田者寡游手之民充斥道路欲爲亂者十

家而七當是時倡爲亂首者一二人而四境之民
一日雲合而響應者四五百人明日則數千人矣
初猶以乞濟爲名旋卽恣所欲而取之矣白晝大
都之中斬關而奪之金傾覆良善震動官府而亂
勢成矣時則主事洗子桂奇奮同室之鬪不避艱
險親往諭之誘之以利懼之以禍其人亦皆愧服
解其黨而去願受約束是日所保全者蓋數十姓
云於是畫爲權約先自出粟煮粥以勸二十四鋪
之有恒產者亦各煮粥以周其鄰近遣人分護穀
船米市以通交易陰械爲首之最桀驁者一人以
警冥頑亟訴當路遣官撫諭以安良善乞粟於公

府以繼粟之不足始因淫霖傷稼躬禱晴於神以
慰民望繼因鐵蟲爲災復爲文以驅之是以一權
約立而民罔有背戾者焉拯數百家之危活千百
人之命而不尸其功者洗子是也由前所云無得
意之位能致之權徒以其忠義之所激發能使咆
哮嘯聚之徒化而爲良民而大難平者非此也耶
佛山及張槎之父老多洗子之功合詞於行部欲
與二十二人者並入祀典祀之洗子聞而力止之
此余之所睹者也謹按國朝議功之典以甯濟一
時與摧鋒萬里者同賞然則二十二人者能捍外
變摧鋒於萬里洗子能靖內亂甯濟於一時其勞

佚久速有不同而同於共濟艱難者也要皆在所
議者顧非其時與地則人以爲是適然矣漢鄒陽
有言明月之珠夜光之璧以暗投人於道衆莫不
按劔相盼者無因而至前也蟠木根柢輪困離奇
而爲萬乘器者以左右爲之先容也天下之事大
率類此余獨悲二十二人者布衣起窮巷建大勲
勞將必有雋異之行爲衆所推服者而當時之人
皆淳樸不以文字顯於世故其行不錄洗子甫登
第授職輒謀歸養屏跡城市開徑方山古今載籍
靡所不究又多著述跡晦而道愈明身隱而名彌
顯足以取信於鄉人舊矣夫以介然一身坐銷大

變於萬姓危疑之日謂不有所本哉余暇日爲此
論入吾之家乘將以告吾子若孫知鄰境有此變
亂而亦莫不有豪傑之士共濟艱難者出焉忠義
鄉之名於是爲不誣云無何廣西大叅元生陳子
至自錢塘丹陽令石臺岑子至自京師聞余有是
論也率諸士庶造雲帽之廬謂余曰吾鄉有忠義
之士焉功成而弗居名立而不傳猶幸吾子之持
正論也或可藉以不泯願吾子之言吾將圖爲錦
藏之祖堂歲時祭祀賽會必張之以明示我後之
人其於風化似非小補且洗灑通者洗主事君之
高大父也世以忠義相濟其庸可無述乎哉余故

併論著題曰世濟忠義記以歸之

明刑部郎中邑人盧夢陽撰

湖廣按察司副使邑人陳紹儒書丹

河南按察司僉事邑人李兆龍篆額

嘉靖三十年癸丑八月立

陳志

修通濟橋紀畧

余鄉通濟橋莫詳其所自始夷稽厥道水通大沙
弼堂簡村石碯奇槎諸鄉陸通魁岡大江深村石
頭石灣黎涌潘村麥村諸鄉其稱名固當蓋諸鄉
以佛山爲大都會橋其要津也代修代圯記其近
者嘉靖三十八年深村堡霍觀察勉齋修以颶風

毀隆慶二年觀察之伯霍隆修又復毀萬曆九年
邑令葵東周公修柱架煥然更新可通輿馬焉比
於創矣今纔五十年而毀盡不肖少年周道上塚
業不勝飄搖之色迨持服歸來跋江干所見惟孤
椽零丁蠹穿啄剝幾不可措往者來者追潮涸塞
裳以涉心甚念之一日與建衷季兄語兄曰余抱
此願久矣余將罄力焉弟其爲我共此不肖曰甚
幸持鉢陋也歛箕擾也昔人捐百什以惠浮屠氏
無甯捐此惟是經營度量工無竅材無僞而後貽
厥永爲吾兄能也併無以煩里旅兄曰余不憚費
敢憚力因謀諸父老曰易故而新其結楹也木與

石孰便父老曰木石之相去遠矣特苦費耳旣任厥費盍易諸不肖曰非也盍策其便者茲橋會上游諸鄉之水建瓴而下水溢固自有時萬一茫茫巨浸謂橋石實壅然誰執其咎父老曰若等籌之熟矣以諸鄉之壑易吾一橋之安吾弗助子子其無惑不肖曰甚幸卜築有日矣弼堂大沙諸鄉以鑿石壅水來告相踵於道於是吾鄉父老日有難色言者曰盈盈衣帶水環諸鄉而放於海恃通濟爲疏瀹之門下彌狹上將彌壅百萬其魚矣橋以稱濟也奈何稱厲嚮之年固木楹也從木便難之曰遡吾鄉而上濱於水者以弼塘爲大弼塘之爲

橋約略自在也兩岸束以巨石空梁以行纔可十
五尺吾橋空視之不啻寬矣卽結石而捍於中流
不及橋空三之五諸鄉倚涌帶爲利墟者塲者與
夫延瀦而畊者日越夫故畔焉而天行固無恙也
使狹足以障流請廓其甚狹者無以問吾橋舉大
事當計久遠奈何委巨材於陽侯幸諸歲月從石
便如是築舍者數月莫適所主已而乃用木石參
半之說蓋兩利而並存焉諸鄉乃帖然無異議而
鄉父老猶呶呶焉謂予實遷就畢局非策也經始
於天啟五年八月二十八日以六年二月二十二
日訖工界橋爲七楹從曠制也中植巨木爲柱磐

以蹲鴟凡三楹以疊石而達於樞流之上下如末
銳殺其嚙益以固岸之石綿亘而洞其中焉凡四
楹其長一百二十尺整廣九尺有咫木梁五尺有
咫東岸構亭而覆之繚以周垣凡兩楹長三十尺
廣十五尺一以息民役一以建貞珉而鄉約聚會
咸麗焉蓋以價買諸梁氏者闔費糜三百二十有
五緡其石取諸潭州蓋馳檄以命工垂署邑玉笥
張使君所惠也餘則季兄及余共肩成事以迄於
落噫家季兄別歷丞簿間以廉謹聞資產僅逮中
人而罄所有爲德無倦色此特舉其一耳頃麥村
等鄉日持酒食爲勞具以見孚義之篤如此橋旣

成追維率作勸相之始緊使君之德不敢忘乞言
志諸有永備述梗概以聞併以告夫後之有事於
斯者併中楹而石之可長無圯患已

天啓五年八月經始六年二月訖工

里人李待問撰

陳志

通濟橋記

粵故澤國也職方以粵爲尾閭而西北兩江爲近
北自陵江度滇水西發源黔滇經萬度羚羊會北
於黃木建瓴南下稍折而西由大帽放於海其東
折支流不可數一徑於佛山諸鄉匯焉通濟橋所
由作也鄉父老爲余言歲甲寅西潦作丙辰則北

江決防壞墻屋則墟里爲魚假令橋在不以此時
圯耶語曰近川者浸扼衡流而橋故自苦不橋又
病涉炎海戍夫無水可度藍關僊客有馬不前余
代庖南武不獲以餘閒繕瀕水修途竊自愧而中
丞李公以栗里故偕兄司幕君慨然樹不拔之基
捐橐金不煩里旅不愛省試勤渠時里中議伐木
者難石議壘石者難木幾爲道旁舍公謂橋以通
濟名必通而後有濟也遂用木石參半之說經始
於天啟五年八月落於六年二月計工餘半葺橋
長百二十尺凡七楹蹲鴟三橋之外更亭之以休
行者歲時講約好會亦於是焉在向常修於觀察

霍公與瑕繼新於邑令葵東周公然未若今壯而
備也凡糜金錢三百二十五緡皆司幕君任之而
中丞公佐之以底於成厥功偉矣哉抑予因是而
知政焉記曰善溝者水漱之善防者水淫之漱則
爲川淫則爲防下令如流水之源不涸不波可飲
可漑覃耕鑿而不知蓋取諸川圯濫則無經不由
道則汜濫故君子受之畜自好者以畜其德忠諫
者以畜其君長人者以畜其民此物此志也蓋取
諸防而且上不病壅下不病壑置尊中衢高下斟
酌焉蓋取諸通翟宗魯臨河負脰痛者子產以乘
輿渡溱洧豈其市德置寶笈於迷津濟衆生於彼

岸蓋取諸濟川以行仁防以正義通以亨屯濟以
拯溺修此四者故全也抑更因是知中丞公焉橋
圯數十年公一朝修復明作之效已自章章今天
下敝起因循多至不可收拾通公明作於天下何
蠱不幹堅石因其岸邦家基也巨材壯其趾棟梁
任也犬牙相函魚鱗密次權衡事也一木所幹萬
鈞爲輕踴若戴鰲矗如岳壓望之若垂長虹跨紫
虛履之若從明河趨閣道掩天絃轉坤軸手也善
建不拔聞諸老子子請以方中丞公於是鄉父老
聞而歌曰周道如砥垂虹而偉於萬斯年率由道
揆公亦執爵而落曰湯湯中流可方可舟百年有

作雖休勿休於戲功偉矣客顧謂伐石潭洲予差
有力焉余小子碌碌所謂因人成事者也貪天之
功子則何敢公名待問號葵孺登萬曆甲辰進士
見任巡撫應天都御史司幕名徵問號毓劬原任
直隸鎮江府經歷俱本里人并書於石

天啓五年八月經始六年二月訖工

東陽張國維撰

陳志

鄉仕會館記

夫士君子負有用之才應當世之用出而抒素蘊
之奇抱處而垂不朽之令名詎非盛事耶鄉之諸
先生由衡門而奮跡鵬程抑何彬彬盛耶考其始

而通籍藩臬監司則有公會以紀姓氏以序名齒
繼而院司考成薦上畱部謁選都門皆有會館以
聯梓雅以紀除授視前人之軌轍爲後學之堇型
則茲會不爲不重也獨吾鄉會無專館前諸先生
幾經議創而落落難合竟作道旁舍凡有公會咸
至止靈應祠旋聚旋散率無成規俾前輩高風遐
軌世遠漸湮後人雖竟勤仰之思未免望洋之歎
迨天啟改元值舜孺李公完素梁公並奉予告解
綬還里倡議於靈應祠之右擴隙地而新其垣堵
飭以塗堊大中丞李公顏其堂曰嘉會而諸先生
冠蓋畢集車駟如簇柰門徑紆曲庭除湫隘每厭

視之輒謀改遷葺有應者二公乃慨然力主鼎建
之議遍閱而斯地適符其勝首捐資售地以爲諸
仗義者倡毓劬李公完赤梁公錦灣黎公力贊襄
之陳玉京等八人共協成之二公親身經畫不辭
勞瘁聚材鳩工庀費計庸甫數月而門庭堂奧煥
然改觀規模宏遠矣乃謀所以畱芳於後者懇余
搦管以記顧余言微曷足爲茲館重哉雖然大中
丞翁命之矣嘉會之義不可思乎按易文言云嘉
會足以合禮蓋禮以忠信爲質毋徒周旋揖讓以
飭彌文斯其會爲可嘉也今而後務矢合簪之誼
歲有會會有規勸誘德業糾繩愆過所以風勵流

俗維持世教厥功誠偉將俎豆而尸祝之無愧矣
昔文潞公富鄭公晚而退休與諸公爲洛陽耆英
之會都人士至今頌之然則斯會也與古人較隆
而媲美奚不可是役也工始於丁卯四月十七日
癸丑訖工於十月初七日庚子凡釀貲姓氏並列
碑陰是爲記

承德郎南京北城兵馬司正兵馬前知京山歸化

二縣事龐景忠撰

天啓七年丁卯正月立

陳志

修崇正社學記

本鄉文昌宮蓋先輩課藝暨虔脩祀事之區也人

又勃起科甲聯翩雖由人傑實關地靈益若斯之
重哉歲久圯壞觀者不無中興之意迺歷議鼎新
而貲無從出數十年來竟成築舍說者謂近來文
章匿采端實由此會比部李康老以忤魏璫還里
瞻仰之餘低徊久之慨然捐資若干緡并勸諸生
隨家饒乏助工若干緡庀財鳩工鼎而新之於是
圯者脩壞者飭數十年頽廢之景象一旦輪奐且
聽形家言遷大士於右殿恢厥門路高厥屏墻而
塑文昌帝像於其中以起後學敬仰洵盛舉也工
旣訖而督漕尚書李葵老戶部主政龐未老皆賫
助金至孝廉霍叔老亦慨往歲祀典不光甲子獲

雋時捐貲貳兩俾歲收子錢以脩歲事而東莞氏
之罰金與清查宮後鑄冶餘地歲租及文昌堂館
租亦附焉嗣是而文獻有徵粢盛豐潔人文輩出
諸老之功真堪不朽矣但收支無籍則乾沒可虞
今議設簿二扇凡歲中一切收租支數揭於出納
俱要登明簿內以待稽查庶不失從來美意而後
輩亦知振起之有自耳里人霍從龍撰

柵下天妃廟記

按傳天妃林氏女閩之莆田人父名愿仕宋爲巡
檢女生而靈異不肯結褵能言禍福輒奇中沒後
其鄉人立廟於湄洲之嶼歲時崇祀焉嶼在興化

之東南海中與琉球國望宋宣和間敕封順濟夫
人元至正改封靈惠我朝洪武初敕封護國庇民
妙靈昭應宏仁普濟英烈天妃春秋有祭載在祀
典海濱山澁無不思潔蘋藻薦犧牲廟貌崇隆香
火鼎盛幾與漢壽亭侯今關帝並稱猗歟盛矣五
羊城南有特祠當事者春秋司享南海佛山忠義
鄉柵下里古有天妃宮以增形勝歲時遐邇虔禱
車擊肩摩應將桴鼓其所從來匪朝伊夕然地勢
湫隘祠宇歲遠漸湮會今上改元之始歲爲戊辰
乾坤煥然恩淪中外而余兄好問方解幕政休沐
里中遂與諸鉄商陳震祥周文煒等議爲鼎新之

計醵金五百有奇庀材鳩工擴其地易其制一大
創之工始於四月初九日辰時落成於九月十三
日入火地縱七丈衡三十一尺前有門門有棹楔
內有廣除宏闔朗洞左右兩廡翼然巋然中堂廣
深設神像俎豆其間後建公館堂寢爲鄉人及衆
商讌集之所巍煥一新壯宇內巨觀不獨雄視鄉
國而已余兄以諸商意緘書漕署授余記其事回
望家園神爽如在誼何敢辭考祀典卹大災捍大
患有大功於民者俱得血食於斯土遡稽路允迪
張源陳嘉猷彭必盛林霄姚隆前後諸公獲福於
神者如此顯應則吾鄉所梯山航海出入商賈涉

厯宦途以至於耕鑿歌咏其徼惠豈淺鮮哉今日
海不揚波普天同治上而后王君公下而農販嬰
孺無不知崇奉者其於祀典又何有焉是宜世世
享有廟祐而余且樂爲操筆以紀於貞珉是爲記
崇正元年戊辰 月里人李待問撰

重修靈應祠鼓樓記

靈應祠之鎮忠義鄉也誠一方鴻芘萬古鉅觀其
爲右掖也有鼓樓焉源遠流長遞脩遞圯迄今夕
陽斜入碧草堆長殊深壁破垣頽之感其何以峙
左右之鐘鼓而壯廟貌之形勝也余每徘徊環顧
中心踴躍亟欲旦夕而鼎新之幸賴梓里同志者

多咸樂捐輸得若而人合得金錢若干而遂庀材
鳩工於五月十五日經始八月之晦日告成實冲
宇霍君之力居多焉肅次芳名勒石永垂不朽今
而後聞鼓興思莫不倍奮忠義期繼響於千秋亦
好義終事之一斑云爾

崇禎二年己巳 月里人李待問撰

重建南擎菴記

大士之祠遍普天也所覆所載之際黃耆黃口之
儔莫不肖像以事尊親同於祖禰蓋法雷頻震智
月常圓若或使之也汾水南擎菴起不知何許年
地不知若干日但見黍離稷穗風雨不除庇神君

僅片瓦爾雖林可浮履可渡八萬四千臂目棲息
於何有之鄉而妥侑之道殆不然也倫君泰我等
與鄉僧海福普來鳩工庀材經營拮据且不憚沿
門持鉢而屬緣弁於余諸檀越亦欣然義助吉涓
巨細之務皆問於神今落成矣竹苞松茂鳥革翬
飛是役也不日成之蓋神助也董是役者倫君泰
我梁君清宇洗君九寰崔君海屏夫有美不揚後
何以勸余故列其姓名巔末於左使後之君子知
所自焉里人龐景人撰

重修靈應祠記

昔人謂南海盛衣冠之氣者豈偶然哉說者謂地

脉使然而不盡然也是必有神明之貴血食其間
如解州之關夫子廟朱仙鎮之岳武穆廟是皆其
神靈降綏禋祀茲土用能維千百年之命脉而俾
國家長享有道於不窮吾鄉佛山舊爲南海之冠
凡庇茲宇者咸獲鳩其保聚生齒日繁四方之舟
車日以輻輳者則實惟帝之靈爽有以致之也其
廟號祖堂以其巋然爲諸廟首其神司北方之水
是爲元帝予自幼聞諸父老言帝之著異於吾鄉
者不一獨於禦黃蕭養之亂爲神最靈亦最奇後
予服官於朝垂三十餘年累藉神庥備員卿輔歲
辛巳予以請告南還卽謁神祠而見夫墻垣日久

萋茨不除朱題漫滅又其堂廡湫隘雖日具染盛
備肥腴不疾瘕蠹而一拜一跪間得毋顧風雨而
飄搖委神依於草莽乎因退而敬捐俸金謀所以
新厥廟貌者材取其庀工取其堅自堂徂基壯麗
宏敞榜其殿曰紫霄宮外列牌樓復以其前爲照
壁飭以鴟吻是役也董其事者則有予姪述生從
姪几生經始於辛巳孟夏厯數月而工始竣由是
而遊於廟中者遂有輪輪奕奕之觀焉而心力亦
云竭矣顧自念筮仕以來清白之衷久矣在帝左
右今茲之役實荷神棊繼自今其惟帝昭明迄用
豐年歲脩禋祀以阜成我忠義之賜邦上翌聖主

佛山忠義鄉志 卷十二
有道之靈長下啟我師之毗倚俾吾南海衣冠之
氣日新而月異者又豈獨一鄉之福庇而已哉因
書其事於石以垂不朽云

崇禎十四年辛巳月里人李待問撰

文昌書院記

佛山忠義鄉向無文昌專祠有之自大司徒李公
始公嘗捐百金購學田隙地畝餘以爲山川之秀
畢萃於此因創文昌院三楹設祀業以供春秋伏
臘約費壹千叁百餘兩經始於崇禎壬午秋落成
於癸未之冬金碧丹堊輝映日月一以培風氣之
不足一以作士類之維新甚盛心也予按天官書

以梓潼之神權輿於張仲其言九十三化大都以
忠孝爲本在周則與吉甫佐宣王中興歷漢蜀隋
唐以至有宋拯溺亨屯誅逆助順寓內尊崇之操
觚者乞靈干城者覬勝弓鞫祈禱靡不奔走趨事
不但揚越已也公自幼服膺神教通籍四十餘年
過化三邑以循卓稱典禮掌銓則寅清簡要凜然
樹南宮眉目旋以九列開府吳中吳爲天下財賦
之區公汰奢侈崇節儉時璫焰煽虐章凡數十上
而無片詞媚權不茹不吐惟公有之比督漕務疏
通運道輓無愆期時流賊披猖募行伍三千餉犒
衣甲器械所費貳萬餘無從搜括盡捐紙贖公費

不足仍以俸繼之迨兩撫報代毋論薦舉不任謝
恩卽一切俸薪堅辭不受江之南北至今服其廉
潔口碑如一日也入掌邦教三邊持戟之士藉公
宿飽免呼庚癸公移居公署杜交際絕情面仰屋
而籌殫厥心力雖寢食亦且不遑以至積勞成病
手足痿痺先帝憫其忠勤遣醫頒賚上尊禁鬱絡
繹於卧榻前眷注之隆近代罕見五疏乞骸始獲
賜傳而行自公釋重負歸里省會監司干旌在門
必求促膝以請語次無非爲桑梓計久遠當連寇
竊發自鳩工以築銃臺又增城北垣堞脩復古路
凡二百里歲祲捐廩以賑閭左人人德色所居之

鄉設營堡建橋梁立大宗祠置嘗田書田鼎新元
帝廟不靳解橐數千餘金鄉黨咸稱義舉至於居
家則敦尙儉朴布衣蔬食無異書生態內外之人
皆化之自公創爲書院文運蒸蔚而起諸士尊之
如父師及捐館舍諸士失其典型哭公於書院奉
其像位而祀之俾子爲記子知公之精爽陟降不
越茲地生平靖共正直與神之忠孝頡頏崇祀一
堂何愧焉子鄉李忠簡創慈度寺於海珠崔清獻
捨宅地爲學宮迄今四百餘年兩公血食附在寺
學以公視之鼎足而三洵不朽盛事子雅服公在
朝在野始終一節不揣書其崖畧益信公之忠孝

通於神明實不誣也

崇禎十五年壬午經始癸未冬落成

失名
陳志

國朝

重脩厚俗社學記

吾儒德業不恃生質之良也而在乎學之之功又不獨學之之功也而先乎教之之力一人之教莫若推於一家一家之教莫若推於一鄉古者家有塾矣黨必有庠所謂一道德而同風俗不在是歟吾鄉之有社學其來已遠曰崇正曰敦本曰蒙養本坊厚俗居其一焉前人聚族於斯以爲聖人之道百行典型不可不亟講也於是鳩工庇材巍然

堂構俾羣子若弟少而習之壯而行之以成仁厚
之風此社之所由設名之所由命也意良美矣以
故人文蔚起或以行誼著聲或以經學名世或撫
字而載歌良牧或執法而敢忤權璫或主計而持
籌憂勞成痼或矢志孤忠慷慨臨難豈非居恒教
之有方學之有漸爲斯社之明驗也哉迨歷久風
雨頽其南陽而前楹奉祀參差不一幾於廢墜維
新孔亟余有志焉而未能逮也會里中區君何君
首倡厥議相率僉助得若干緡適平虛上人駐錫
境內共襄盛事經始於今夏六月念六之吉迄仲
秋而落成祀諸神位仍之也而遷於堂念事重名

教義捐者不可以不記屬余爲言勒諸貞珉以垂將來余惟斯社盛德大業所從始也有前人之開創文章聿興藉今日之紹脩儒風丕振是作者與述者咸穆然於古道矣後之學者少習壯行毋忘斯意庶幾終成厚俗乎若夫文章經濟蟬聯鵲起媿先賢之休烈而光大之余不敏矣願諸君子交勉焉區君名兆魁字文昭何君名賢字奕良上人法名成均字平虛並有功於斯社因備記之

里人李象豐撰

康熙五年歲次丙午冬十一月二十六日立石

陳志

文院祭器記

新文昌書院既建中祀 文帝左祀 魁斗星君

右祀 金甲神君三神中惟 文帝龕幃備具供

器輝煌踵事增華已無可尙而左右二神猶多缺
略有待義舉王申春邵子東垣唐子賢峰曹子曉
峰江子在公陳子國侯萬侯同集院中慨然興思
歸而籌諸同志共得二十餘人各捐其資不數月
增建星君神君神龕二座復于案前設立供器二
副端嚴莊肅 三神如一行將使入廟者觸目生
敬因敬生慕因慕生力讀書實踐以對 神明修
文明道以希先哲則此一舉也人才之興士風之
振皆于是乎在豈特區區爲觀美而遂已哉夫有

功必錄以示勸也若茲諸君義舉不可不傳因勒於石以誌不朽云

賜進士出身翰林院檢討鄭際泰撰

康熙二十一年歲次壬申七月乙亥吉旦敬泐

脩靈應祠記

南海廣郡附郭邑也所隸有佛山堡距會城五十里爲上游地連鄉接畛沃衍四達濼鬱之所經於其北四方商賈之至粵者率以是爲歸河面廣踰十尋而舸舶之停泊者鱗砌而蟻附中流行舟之道至不盈數武橈楫交擊爭沸喧騰聲越四五里有爲郡會之所不及者沿岸而上屋宇森覆爾望

莫極其中若縱若橫爲衢爲術幾以千數闐闐層
列百貨山積凡希覲之物會城所未備者無不取
給於此往來驛絡駢踵摩肩屢肆居民楹踰十萬
雖曲遂之狀無以過也其逼西一隅爲地脉所由
鍾有祠而顏曰靈應所祀爲 元天上帝聖斲之
制大類唐宋以上蓋其所以權輿乎茲鄉者不知
幾千百年矣當明景泰中海寇黃蕭養倡亂屠陷
鄉邑郡南數百里堡落萬千無不爲其所脅至於
覆官軍圍郡縣鋒炤所至曾莫與櫻而佛山四面
列柵相距數旬賊衆輒見皂麾中有巨人元衣披
髮手揮長劍冉冉而出故當之者毋不披靡云事

平後布政使揭公上其狀詔予祀典迨崇禎時鄉人大司農李捐資重脩制度視前稍擴矣惟祠前之地逼於民居湫隘特甚且厯代所捐送田畝爲香燈奉者悉入中飽甲子之春鄉紳士龐之兌李錫簡等耆老洗闇生何景純龐燕甫等發願重脩設簿廣募祠前民舍高值買置牌坊廊宇株植臺池一一森布望者肅然而几筵棖桷丹雘一新葢廟貌於是成大觀而田畝舖舍咸就清理收其歲租以供祀典中飽之弊遂絕則紳耆繼事之勞不可沒焉然神之爲道至幽杳難知者也而帝之靈其應如響蓋不特退賊一事爲然其於佛山之民

不翅如慈母之哺赤子顯赫之跡至不可殫述若
是者何也豈以南方火地以帝爲水德於此固有
相濟之功耶抑佛山以鼓鑄爲業火之炎烈特甚
而水德之發揚亦特甚耶吾聞 上帝之祀有天
下者之禮則然而茲下逮於氓庶毋乃褻神而瀆
其貺乎不知王者之祀郊天之大典氓庶之祀事
天之實心也然則所謂 上帝者一天而已矣萬
物本乎天是則能事天者乃其真能事 上帝者
也佛山之民其庶幾乎故在五行則有相濟之用
在人心則有敬神之功帝之廟食乎茲土者豈偶
然哉余備藩東粵百神之所主也故於落成序其

事以誌之凡田若干畝舖舍若干椽土名若干處
與首事之紳耆捐助之善信其名氏悉載於碑陰
康熙二十三年歲次甲子 月立
廣東承宣布政使奉天郎廷樞撰

雜記

祠原載戶稅八十三畝萬曆清丈始餘稅六十九
畝此時侵佔已不可問矣浸復以癸亥清廟地而
起海槎之訟後之聞者僉曰清則有禍而不問禍
所由成以廟地爲畏途任其侵佔結舌者又數十
年春秋

諭祭紳士罔聞卽有遣官而上慢下盜藝神不堪其違

神明茂典制者甚矣癸亥之夏偶與南洲李君彝
仲梁君熊子簡君翰章梁君圖章梁君避暑園林
談及其事思欲肅清用慨然同志焉稽舊誌考父
老烈日披汗歷近地而訪之準時定租計歲八百
餘金每祭集紳士里排豐粢盛陳祭器嚴對越拜
舞飲福以彰

朝廷德意歲租自辦糧兩祭之外留爲鄉中大事支
給業租備焉用立簿一扇載其事宜顏曰雜記獨
是尙欲丈清祀田椿明四至寫載田形刪定舊誌
付之剗劂使家傳戶曉經久永垂則尙俟董厥成
之君子也余日企而望之

康熙二十五年上元穀旦龐之兌東侶氏記

重脩錦香池記

昔晉記室郭景純留識於靈洲曰南海盛衣冠之氣當是時人物盛於江左粵隸屬遐陬乃若所云豈非靈氣所鍾善審氣機者豫得而券之耶夫氣之翕而聚也必有神焉守之氣之流而行也必有神焉宣之雖時有先後主之者惟神佛山鄉風稱巨鎮牂牁之水西來青螺之嶂北峙勳名文物埒於中邦五嶺以南亦一都會也其間四方之貝貨商旅之輳集仕宦之往來絡繹於茲有神曰真武元帝保障功高不可殫述昔景泰間渠魁黃蕭

養蜂擁流劫鄉邑或懼而倒戈此鄉藉神威鎮星
旗赫濯望風披靡卒罹天誅有司疏厥功請封典
敕爲靈應令州縣歲脩祀典載在邑乘童叟至今
紀之神廟食於斯據形勝之上游接靈洲之佳氣
委蛇窿伏延袤百餘里特鍾靈於此維帝主焉初
祠曰龍翥形家者言曰元武屬水龍得水而變化
乃神爰鑿池於祠之南爲錦香爲灌花二池相表
裏以瀦衆流之滙日久淤堙至今灌花爲平壤矣
錦香尙存磬以礪石繚以雕闌刻石爲龜蛇狀引
流種樹其間遊觀者有臨流眺望之樂日久池水
漸涸雨潦時至四衢爲之洋溢是坎離不交山澤

之氣未通也爰議浚之由古洛社涌旁始結石渠
引水而灌之池謀諸人人曰可卜諸神神曰從質
諸星厯形勝諸家僉曰吉用是釀金輸粟罄土鳩
工不數月而告成自是衆流之水以池爲歸龍得
水而神益靈龜蛇得水遂其生日星雲物得水而
顯其精文之瀾詞之源學之海得水以成其文猗
歟休哉神之在天猶水之在地也神之降福猶水
之在下也挹之注之則覃而濶疏之瀹之則流而
行瀦之蓄之則停而平凡此皆人力之爲亦神威
之佑也工旣竣將勒石以紀其事屬言於予予世
居此鄉荷神庥庇仰報無從茲舉也何敢遜謝爰

捉筆而爲之記里人洗煜撰

新文昌書院記

粵稽古 文帝肇自清河應乎張翼現十七世宰
官身斯文提衡綏佑介眉隨祈禱無不徵應立廟
建閣設像以昭事者普天之下所在都有而南海
佛山爲尤盛自

國朝奠鼎以來四方輳集而英俊多萃此鄉其間簪
纓蟬聯聽鹿歌芹者接踵而起無非明神主宰陰
持默相乃人懷享祀之誠而廟貌未肅豈所以奏
昭假來景福乎歲癸丑僑居諸君陳繡卿盧挺朝
等毅然倡議或捐地或捐資力任經始之勞一時

同志又皆踴躍題助共成厥美外闢崇門內建魏
殿廣厦堂堂廊廡翼翼仰明威之儼若惟陟降
之在茲歲時瞻禮有所春秋會祀有期鍾簋豆籩
秩然具飭且永置祀業旁葺厨舍次第修舉以答
文明啟佑之庥以襄

國家作人之效聯道義聲氣之同講藝文風教之辨
胥於是乎在建廟蓋肇於今然由渙而聚由聚而
興由興而隆隆光大知必什伯異地而於昭永永
也惟諸同志益敬厥業虔厥事創始者毋以勤勞
於前而懈其志踵事者毋以增華於後而易其規
勿異勿同緝熙祀典惟帝式臨久而愈赫山川

之氣積而彌昌父兄之教先子弟之率謹於以應
運篤生而科名而勲功而理學如倫如霍如梁如
方如陳湛諸先生者後先輩望登壇建鼓經緯裒
然咸將拭目俟之諸君子礪貞珉以垂遠屬余紀
事敬勒數言同事者備書於左

賜進士第中憲大夫湖廣武昌府知府胡景曾薰沐拜
撰

敕授文林郎直隸河間府故城縣知縣黃挺華薰沐篆
額

敕授文林郎河南懷慶府河內縣知縣李檉薰沐書丹

康熙二十九年歲次庚午孟春吉旦

陳志

重修靈應祠記

西雍四時秦祀不聞黑帝子漢興高祖加祀北時
五帝之名始著前代正統間 神捍黃蕭養亂廟
遂爲吾鄉靈應祠

諭祭春秋祀典勿絕宜哉歲三月都人士上巳賽 神

莫不虔恭飭事飲至廟中奉璋以告奉酒醴告奉

粢盛告欽哉蓋各承靈一天覩備物之咸有矣然

年甲不再日月其除茲往事之易湮維廢興于吾

黨變本加厲因故宇而光大之實予叔祖忠定公

捐貲力新厥美而予家大人瑞映公亦捐貲任茲

厥勞則廟石固存甯俟口碑傳信耶迄今世遠人

違田漸併于豪強器或隳于世守予向憂之而力
未逮藉緣首洗闇生諸公廣爲募化而廟貌之剝
蝕以新東侶龐公與同事六君子力爲廓清而祭
器之殘缺以飭庚午之役予親身勘丈而田土之
湮沒以歸凡歲時哀對廟中遂無不平不戒之慮
焉今春吾弟公賚與值事諸公復恐其久而漫滅
也于是圖諸剝劓囑予誌之首廟貌次土田次祭
器夫鐘鼓集鯨音之震響用妥 神依樓臺肅貌
座之高明聿毗

聖壽覽入廟而生其敬者覽斯圖而可知已泰山之祀爰

錫祊田保介之咨受釐上帝所以成民力而致于

神也今而後其敢有率我蝨賊而蕩搖我疆里乎
召虎平淮昭有功則錫爾珪瓚偁父南代節字金
則彰爾鼎彝 神爲

天子默佑斯民可無鐘懸之守也庶幾哉其無有譏挈
瓶而悲失墜者矣余嘗俯仰百年間 神之威靈
如在也而廟典之存亡創興之率由者代有其人
予故嘉諸君子能相與有成與龐洗諸公之志無
遺後先用大慰予所未逮者揚 神庥于罔替享
國祀之無疆其在斯乎是爲記

康熙二十九年庚午 月吉旦里人李錫祚撰廟志

崇正社月課碑記

天有光華之象應于日月星辰地有榮昌之氣萃
于山川河嶽人有經濟之才徵于文章品行故其
人而端莊文則嚴正博雅也其人而詭僻文則佻
巧而幻宥也其人而淺俗文則疎庸而卑靡也一
代之興應運以生者世不乏人處今日豈無卓然
自命一出而應 廟廊之選于以起草承明待詔
金馬裕如者必其積學有素博通經史根極性命
之理者也如僅撫拾餘唾僥倖一時亦屬塗飭耳
日終非大成之器吾鄉自昔英賢輩出冠蓋相望
其輝煌傳誌者指不勝屈文人萃聚益彬彬大都
會也邇因文體屢變操觚者靡所適從非得一二

有識之士商確砥礪期歸大雅烏能出而穿楊拾芥名噪海內耶余解組林臯投閒十載竊以此舉商之同志茲幸羽翼有人踵而成之端不負先賢接武之意攷社學舊有月課因供給無資今諸友慨然捐資創建鋪舍歲收所入以勸會事寔美舉也董厥成者有李公冕梁翰章彭壽庵冼襄文黃兼三冼容子若而人鳩工庀材不日而成昔先儒許衡有言爲學莫先于治生藉此以資爲學之具今而後文明日盛庶追踪往哲與余願諸公始終如一余亦拜手而稱慶矣爰勒貞珉以誌不朽云

鄉進士奉直大夫協少正尹知湖廣安陸府荆門

州事加一級前文林郎貴州甕安縣知縣兼掌
貴陽府開州印務督理平大黔威四府軍餉壬
戌科鄉試同考官里人龐上梓拜撰

誥授明威將軍廣州左翼鎮中軍守備里人李聖龍書
丹

鄉進士吏部候選中書李紹祖篆額

康熙四十二年歲次癸未仲秋吉旦

清復靈應祠租雜記

五帝之祀載于月令其一爲黑帝黑帝者顓頊之
神居水之位司冬之令而爲大一之佐蓋周天之
度三百六十有五而二十八宿爲經北方七宿曰

斗曰牛曰女虛曰危室壁象曰龜蛇謂之元武武者星形元者水形北帝者元武之精也吾粵星分牛女同隸北垣呼吸與帝座通由此言之神之爲民捍災禦患成民忠義而爲累朝崇報所由歸者禪山爲粵巨鎮秀氣攸鍾故祖廟爲靈獨顯其實帝之神在天有感斯通則正不必沾沾于祖廟也獨是廟貌由來已久而祀典載在春秋者又炳如日星則其本末始終誌之不可不詳曩者祀事厯久而敝土田舖舍半入強侵賴龐李簡梁諸君子力爲廓清癸未值事諸公嘉之實爲文以叙其事而鄉飲一條亦屬同時修舉故並刻之其餘前

後紀事碑文前明諭祭祝文及題扁額門柱對聯
與夫衆當事題贈詩章概未授梓更有事而無碑
者如李忠定公捐俸金數千重修殿宇當時勒石
未就今文稿猶存他若附廟近地供祭土田雖各
圖形而本自何人稅載何戶亦缺而未備凡此者
皆不容泯滅是用忘其固陋黽勉搜羅凡夫一事
一言有關於廟祭者莫不付之剜劂夫紀載明則
神之威靈如見威靈見則承其下者皆生恭敬慕
悅之心匪獨潔爾籩豆奉祀春秋已也行將顧名
思義爲臣思忠爲子思孝爲弟思悌爲民思良力
踐忠義之實以爲明報

國家幽格神明之本則人心風俗胥于焉係之今茲
之役夫亦事之不容或已者也若夫神之顯靈于
某年月日前朝諭祭至我

朝

諭祭于某年月日創廟于某年月日重修于某年月日
則自有前人之言在今亦不復贅云

康熙四十五年歲次丙戌臘月穀旦

值事霍游鳳

梁世美

霍宗光

陳紹猷

李錫瓚

陳世瑛

梁厥修

梁應球

洗元瑞

李象水

梁國珍

羅世彥

李炳球

李泮

陳一凱

重修文院并起廳厨碑記

士君子讀書取科名登仕路若有陰相而默助者
得非文昌司命之力也歟往者僑寓諸君謂佛
山爲福鄉集四方名士倡議捐地釀金啟建文院
規模宏敞棟宇巍峩奉香火而瞻俎豆於以尊神
貺也隆矣在昔沂菴胡先生經始之序業已備悉
然而歷年旣久風雨浸淫重以西潦之餘堂廡厨
壁半傷傾圯莫不欲葺而新之而經營苦于獨力
會予荷

聖天子洪恩護喪歸里日諸君子爲予言之予肅然曰斯

美舉也顧可緩乎哉夫殿宇堂皇而後神庥滋至
不獨祀春秋潔蘋藻爲觀禮之場而歲時課藝亦
畢集于此獨鳩工庀材非一手足之烈子隨捐薄
俸爲美舉倡司而諸君子敬募同人樂助遂煥其
堂聖其壁踵事增華無隳經始蓋亦藉 文昌赫
濯之靈也今春適予南旋歸里諸君子以美舉厥
成過索予言欲勒貞珉以壽樂助諸同人於不朽
予謂莫爲之先雖盛弗傳莫爲之後雖美弗彰今
宏新其堂棟潤色乎鴻規舉從前欲創而未創之
模一旦巍然煥然將見 帝德無疆

神庥永錫翼文運以振士風佑科名而登雲路者未

必無小補云爾謹記

原都察院左副都御史加一級左必蕃撰

首事盧德臣林天才等

康熙五十三年歲次甲午孟冬穀旦立

建茶亭記

禪山東南一巨鎮也其西北一帶上溯滇水可抵
神京通陝洛以及荆吳諸省四方之來遊者日以萬
計然皆以舟舫泊岸不少勞餘力也獨南路通濟
橋爲鎮後門戶當南順新三邑要衝來市於禪者
皆道經於此或竭半日之程或盡半日之力肩不
得息至此者渴思如焚苦無駐足之所夏日炎炎

尤可畏也子忝居斯土按其形勢嘗欲與同人買地構亭從胡武昌梁憲生諸先生所爲施茶者以居之使事與地適後以出宰沅邑宦遊京師卒卒無須臾之間蓋有志而未逮也今歲春同里玉書堯章兩梁君以施茶事廢墜慨然起而修之復醵金卜地於寶豐社右以襄前人所未逮其地廣可半畝前建亭亭臨水周遭引以欄檻與漣漪相映後闢一軒爽塏殊絕暑月以上人煮茗其間遙瞻俯矚真勝槩也工竣將勒石焉梁君具其始末乞子言爲記子躍然喜曰是予之志也夫是予之志也夫德洋恩濺被昌宇宙者君子之心而隨志以

施循分自盡者吾人之事也是舉也雖區區無當於大德之施然使三邑之征途跋涉得憇息於斯亭焉未必非參贊之一端也梁君其與諸君子並垂於不朽也哉

特授奉直大夫戶部四川清吏司主事加一級紀錄二次丙申

欽差監督居庸關賑務前工部屯田司主政乙未行取御試暢春苑湖廣常德府沅江縣知縣兼攝龍陽縣事辛卯科湖廣鄉試同考官朱相朋撰

鄉進士吏部揀選知縣陳清傑書丹

前任浙江湖州府歸安縣知縣曹汲篆額

佛山志卷十二
康熙六十一年季冬九日首事梁玉書立

修復旗帶水記

考之傳曰權以濟變智在利人是以鄧訓改石臼之渠前史謂其有陰德謝傅築新城之埭後人食報於川原則水之爲利大矣哉距羊城之南四十里爲佛山鎮地爲五都之市舟車繡錯蓋東南一大咽喉也在昔有明之盛文章甲第籠蹕一時士大夫之籍斯土者列邸而居薨連數里昔人所謂南海盛衣冠之氣者不信然歟環鎮十里有廟曰靈應祠是前朝所封號也有神曰元帝司北方之水於位爲坎於五行居首故其神最貴最靈

國朝以來春秋

諭祭登以封而酌以庸甚盛典也廟之左為崇正社學
 右為流芳祠前有渠為水道長四百六十餘丈紆
 迴袤裊九折而達於海舊名旗帶水形勢家以此
 為地脈之筋絡也地氣旺則筋絡流通况粵四面
 濱海田多沮洳少墳埴為四瀆之尾閭其以得水
 為勝也宜矣自明之季厥道堙塞人物財賄視昔
 稍替焉雖其鄉之士君子數有志於修濬而力未
 逮壬寅歲奉 神降言謂宜修舉者六事而此旗
 帶水居其一予前宰斯土時鎮之紳士具呈於子

謂神道之有合於人事也而吾卽準人事以修復

之亦何不可於是值事諸子秉心勤瘁協力贊勸

群策不謀而成衆材不戒而備揆日戒徒奮獨旣

具廟租之外錙銖悉本於僉題故蹟是因秋毫無

奪夫穡地百堵興而工程庀一時水之故道遂復

其舊云渠廣內六尺而外一丈深五尺長與舊等

共用工銀二百四十餘兩灰石木料銀三百三十

餘兩落成日癸卯榜發隸鎮之社學獲雋者四人

於堪輿家之說似不可云無驗然此非子所知也

予所知者以通溝洫以資灌溉大田多稼如坻如

京於以荷

神庥介景福粒蒸民綏百祿不誠一

勞而永逸哉卽以子之不敏亦得竊附鄧訓謝傅
諸君子以紓

聖天子之南顧者卽此亦其一端矣於是諸子皆曰善遂
書其始末刻之於石以垂無窮俾後之列渠而居
時加修築勿塞勿淤慎毋狃一時之安而惰窳以
將事是則子之志也夫是則子之志也夫值事諸
子爲梁國選何鍾良梁國輔李炳球陳元佐區際
時潘瀧源李源霍方叔陳捷揚霍銛陳應奇李潮
李連茹霍旦存霍其贄梁儀舜李紹鵬黃萬珍黃
國紘皆鎮中紳士也是爲記

欽授中憲大夫廣東廣州府知府前知南海縣事庚子

科廣東同考試官紀錄二次已卯科舉人宋瑋
拜撰

雍正三年歲乙巳仲秋吉日

陳志

忠義流芳祠記

南海粵東首邑佛山南海巨鎮考之誌佛山舊名
桂華鄉敕賜忠義鄉豈非鄉以人重哉明景泰中
海寇黃蕭養作亂假設名號迫脇齊民寇焰將及
桂華鄉之壯士梁南園等二十二人誓不從賊謀
同捍禦禱于北帝神祠祈默爲相佑神報以
吉于是二十二人各出其貲財以供兵食備器械
率鄉之子弟合力巡守環村樹柵一夕而就柵上

時有羣鳥飛翔若旌旗隊伍之狀賊望見驚怪時
值中秋朗月皎潔外嚴守備內令兒童鼓樂遊戲
以示暇豫賊果駭愕不敢犯而去及寇平藩司揭
公上其事于朝遂敕賜 神祠爲 靈應祠春秋
遣官致祭復嘉予二十二人忠義授以冠帶職銜
辭不受賜其鄉爲忠義鄉以旌表之後二十二人
歿立祠于 靈應祠側名忠義祠子孫世世奉祀
無缺然祠雖建而素無祀田每當祭日其子孫歛
財以供辦此亦向來之缺典也予攝篆茲土思與
邑中興舉廢墜適祠之後人梁廣菴等呈稱追念
舊勲乞酌有餘以補不足請于其先人捐入 靈

應祠之田土名排後竇今成舖屋者量撥一間以

爲祭業余卽行屬官集鄉之紳衿里老詳議具報

詳稱衆皆欣躍遂允其請將排後竇東首舖屋一

間與祠中永遠辦祭嗚呼當海寇之猖狂也攻城

略地鋒不可當倉卒順從以求延旦夕之命者所

在多有而佛山一鄉地平魚齒非有城堡之固甲

兵之強此二十二君一旦奮其忠義遂能捍禦強

寇不污茲土又功成謙退辭還褒典易曰勞而不

伐有功而不德豈非古君子之高義哉予舶舟河

下恭謁北帝神祠因仰二十二君之風規記其

始末勒石藏諸祠壁俾後之覽者感發興起焉

教授文林郎署理南海縣事候補知縣蔣迪撰

雍正七年歲次已酉四月二十六日立

修茶亭記

救天下編戶之渴者哲后也救一鄉道路之渴者
義士也有司幸逢哲后又冀得觀義士以爲快此
予今日所以因南海茶亭之建不以爲小而弗一
言也南海茶亭之建於佛山通濟橋外先是順德
人有僑寓禪山者爲武昌郡牧胡公首捐貲置租
鄉人亦助以有成今者亭旣立矣夫亭之義取乎
畱漢應邵以爲行旅宿會之所秦漢十里一亭亭
置一長明顧甯人謂必有居舍如今之公署又謂

必有人民如今之鎮集代異制殊而所謂公者結於勝地以供遊玩之資結於別野以佐偃仰之便如是止矣茲之茶亭則專以利物爲行旅之宴會炎天溽暑人喘且倦交待茗椀以潤喉吻而掌是茗者卽爲亭之長可也嗟乎草木之瘁也得水而色不枯魚龍之困也得水而翹能奮人亦有然其誰實甦之耶周禮六行之終也曰恤而古君子之周饑饉以睦宗族惠鄰里也有義田義倉之設其餘分穀煮糜拯人之饑史亦有紀其事以爲勸茲之救渴與救饑將毋同此舉願常行之此舉以外尤願廣行之矣嗚呼人有終身之渴有一時之渴

終身之渴

聖天子歲爲民慰之一時之渴爾民亦推德意以慰之予
爲民牧亦不用生其渴也夫

特授廣東廣州府知府加三級陸陽龐嶼撰

雍正十一年歲次癸丑臘月吉日立

佛山忠義鄉志卷十二終

...

...

...

...

...

...

...

...

...

...

佛山忠義鄉志卷十二

金石志下

石法帖

石

國朝

贊翼堂記

古者井田之法八家同井孟子釋之曰鄉田同井
出入相友守望相助疾病相扶持則百姓親睦是
井田不獨所以裕國尤所以聯民我

朝定鼎生齒日繁幅員日廣井田之法不能行而比
戶開闢建籍立戶輸將與井田之法無異然開闢
建籍直省皆然惟粵東廣州郡屬南海縣內佛山

鄉爲特異佛山一鄉內開八邑編八十甲稅富丁
多里皆仁厚兼以地勢坤龍蟠虎踞水繞峯迴元
魁疊出又成一名鎮四方商賈舟車輻輳皆由開
邑建籍得地得時所致也余爲南邑宰久矣心焉
數之迨乾隆己未歲八甲里民於靈應祠前東
南側卜地建祠以妥開建邑籍先人春秋祀典以
光前屆限互登以勸課官無考成之悞民無追呼
之擾祠宇落成請祀於余余喜其有井田之義裕
國聯民之風報本追源之意公餘爲之記魏綰撰

重修文院碑記

田心之有書院凡以萃四方之人材敦崇實學砥

礪廉隅而考文論德共相鼓舞于學術昌明之會
意甚善也我僑寓之麗澤於斯土也非一日矣建
于康熙癸丑爲堂數楹供奉 開宣揚化帝君昭
誠敬重文教一時紳士彬彬稱盛焉始其事則繡
卿陳君等四十三人嗣是春秋有祭歲會有常

神靈赫濯而文教愈興歲甲午挺朝盧君等二十六
人又拓其地以建院之東堂增華式廓壯麗恢宏
元燈之雅集文人之勝事於今賴之詎風雨之侵
蝕堂階之朽壞兼之西堂未建兩翼不得其平觀
者殊減色爰集同人用謀修建僉曰可而委其任
於登科等一十三人勸捐樂助不日而千金有奇

鳩工庀材重興工作其可因者踵故而更新其未
備者購地而創建圈堵以墻使之完故俾前後左
右形勢適均期年而工廼竣夫莫爲之前雖美弗
彰莫爲之後雖盛弗傳是役也建始于辛酉孟夏
落成于壬戌季春用金一千有奇所餘者畱爲重
修祀典春秋祀事丁日敬而行之功毋過于前人
事實關乎美舉人材之蔚起 帝庥之宏敷當必
應時而顯者矣豈僅曰後先輝映以誇一時之盛
事也哉用誌巔末勒之貞珉所有僉題謹列于左
乾隆七年歲次壬戌仲秋上浣穀旦重修首事馮

橙陳世寶黃露黃振泗伍乾勞善士張承灝等

全立石

汾江義學記

成周之制有鄉學有國學鄉學者二十五家爲閭
閭有塾五百家爲黨黨有庠萬二千五百家爲州
州有序各萃其子弟而教焉俾仕焉歸老而有道
德者爲之師是也漢魏以降學制代更至宋慶厯
間允叅知政事范仲淹之請詔天下郡縣各立學
初置教授迄今六百餘年祖其遺規而鄉學或有
或無所在不一夫教化始基起於閭巷則培養人
材以儲 國家之用鄉學之設焉可緩哉南海爲
廣郡首邑有鎮曰佛山煙戶逾二萬四方挾貨賄

貿遷梯航畢集其土著暨僑居者秀異傑出之士
多治經生業闡闡鱗櫛絃誦相聞舊有崇正社學
一區在祖廟左側建自前明延山長課授生徒

聖朝文教覃敷人才日盛向所謂社學者庠隘不足以
容則另僦民舍以爲肄業所市廛喧雜深懼弗勝
乾隆戊午余調佐茲郡卽謀所以廣之適刺史石
門馮君捧檄歸省其封公鹿步先生於里第語次
雅有同志余遂割俸三百金爲倡馮君喬梓率諸
紳士踴躍捐輸共成厥美會奉差北上未暇鳩工
比南旋亟飭匠選材圖完是役經始於癸亥秋八
月閱五月而竣自講堂齋舍至庖湍之所畢具美

箭嘉卉四時蔥蒨觸目見造化生意宏整堅厚不
事藻飭取垂久遠計糜白金一千緡有奇諸生之
負笈而趨者咸欣欣然有喜色請誌其事余因進
而詔之曰諸生亦知設學之旨乎夫學者讀書明
理講求經濟實用以爲化民成俗之資非咕嗶章
句取科第榮身已也考慶厯時胡安定先生教授
蘇湖設經義治事二齋以課士有司請下湖學取
其法著令爲太學程召安定爲國子師迄今彪炳
史冊今

聖天子側席求賢孜孜圖治各憲仰承 德意以振興文

教爲已任如端溪粵秀兩書院皆遴聘宿儒厚給

餼廩朔望親枉車騎稽其課程諸生生當斯時勉
自樹立究明體達用之實學異日出膺民社用治
行著聞使天下憬然想慕蘇湖之教余不敏竊有
光焉若虛聲標榜徒鶩文章詞華之末是豈所望
於諸生者哉諸生曰善遂次其語泐之石

誥授奉政大夫廣東廣州府分防佛山督捕海防同知

加級天都黃興禮撰

南海靈洲謝銓書丹

乾隆九年歲次甲子春王正月穀旦立

新建忠義鄉亭記

佛山嶺南巨鎮也珠江九曲環抱如帶仕宦之所

往來商賈之所出入貨貝舟航之所叢聚地靈人
傑煙火萬家衣冠相繼誌載晉世景純來止靈洲
登高望遠謂南海盛衣冠之氣蓋卽此也或曰嶺
以南皆海故扶胥有南海神廟景純所言恐不盡
此其說未知孰是鎮有尊神號稱元帝聲靈赫
濯保障一方顯應驗著正統間流寇流劫鄉民南
海番禺諸處多有從而爲逆者舟至汾水父老奉
神出戰馘首千計賊猶未退忽見神立雲端披髮
跣足手執星旗賊遂驚走殄絕有司疏績以聞敕
封神祠爲靈應祠鄉爲忠義鄉歲令所屬州縣尊
之俎之以隆神祀絲之竹之以諧神聽歌其功焉

頌其德焉。歷二百餘年，勿替。余以乾隆戊午分符
茲土，涖事以來，賴神佑庇，風雨和會，市廛晏安，荏
苒無警。念汾江爲一境，靈勝謀構，亭江干以延眺
覽，且備行旅，息肩駐足，所因縮俸錢所入，選材孱
工，行店居停，復捐助其襄，而畀巡檢黃君董厥役。
兩閱月，告竣。民以爲便，昔歐陽永叔治滁之明年，
聽泉鑿石，闢地爲亭，蘇子瞻治扶風爲亭，堂北鑿
池，其南今余之建是亭也，不過因其址而廣大之。
池不用鑿地，不用闢，非永叔子瞻二公比，然落成
之日，與客登臨，可以送往迎來，可以接

宸書可以揖上憲，可以肅一鎮之觀瞻，紅日一窓，清風滿

座堦前綠水四時映帶後之君子登高作賦覽勝
懷人知斯亭之建非徒爲遊覽之地休息之所與
二子後先輝映也則幸甚時

乾隆九年歲次甲子春王月穀旦也黃輿禮撰

修醫靈廟記

自神農啜草辨性保物濟用以補救夫天地陰陽
乖沴之氣兩之以九竅之變祭之以九藏之動而
醫肇焉由是人得是理物者扁鵲秦和神得是物
理者有醫靈萬壽帝然人之道絕續無常帝之道
久彌光遠彌彰蓋於今爲烈云余聞山川神祇有
功德於民則祀之况浹人骨膚入人性情令天下

之痛心疾首咸望以紓憂如帝德者哉帝之香火
遍界功及生民無往不在然在禪山之華村里有
帝廟爲靈更著里之人祈賽者肩摩於道凡負痛
以叩於帝者輒不惜調劑以度人厄且猶恐屬於
冥冥參朮君臣復形乩教真不啻響酬而面命之
是帝道保物而物得恃帝同人而物愈得恃廟之
創不知昉自何年昔之父老重修迄今復百餘載
風雨淅歷榱桷湮頽里之人食帝德因念神庥族
兄秀日暨緣首洗應賡等集衆抒誠命工丹雘棟
宇煥然其諏日選辰皆出乩授是帝之愛人無已
則凡所以降福斯民消災弭厄者何所不至至於

抱沉痾而望救則又其顯者矣故閭閻蒼首時疾
痛呼天而天若弗及者惟帝及之童穉嬰兒時疾
痛呼父母而父母弗及者惟帝及之將見夫陰陽
乖沴之氣天地之所不能齊帝之力皆有以補之
則帝之德蓋與二氣同不朽矣順德趙鳴玉撰

汾江義學碑記

予筮仕嶺南得廣郡之龍門令繼又調瓊之樂會
陵水及廉之欽州乾隆丙寅年以邊徼俸滿陞授
佛山同知政暇至汾江義學與掌教及鎮之紳士
論文講學見其地深而廣瞻其宇峻而麗講堂後
兩旁學舍鱗次而列折而之西地可盈畝植以花

柳藏修之所計可容數十百人偉哉佛鎮之鄉校也詢之掌教咸曰紳士捐僉而成與前任黃君義學碑記若合符節迨歲底靈應祠值事紳耆呈繳週年清冊予查核之下內有開列汾江義學掌教聘儀修金及一切鋪陳供應支銀八九十兩心竊疑之見前任黃君碑未齒及爰訪紳耆復出案牘視之然後知義學之建蓋有由也先是鎮之祠業歲租約三百九十餘兩被里排侵蝕約正生員李懋諧籲於初任王君通詳列憲請建義學隨蒙准行而王君已卒嗣後黃君以理事贊郡遷佛山同知涖任卽以建義學爲首務遂與祠之司事梁東

大區枚卜李成勵霍信值月彭金祈李高等商度
念購地庀材非千有餘金不足以濟而祠租之三
百九十餘兩除春秋

諭祭及恭祝

萬壽等項外所餘無幾因勸闔鎮紳士捐簽及祠租之贏
餘以充建學之用又另議历年掌教修金供應俱
在祠租撥出此義學之始終本末而

神恩之廣被爲無窮也予謂上有菁莪棫樸之化下
有磨礪振奮之風上以學感下以學應此理之常
無足異者今

聖天子文治光華普天之下莫不俾率以歸於醇雅而

神又佐以威靈出其餘貲成此鄉校使化而益化非
盛世之樂觀者哉予因前碑之所未逮故備論之
乾隆十一年丙寅石阡田宏祚撰

海口文昌閣記

乾隆七年九月佛山之文昌閣落成諸紳士相率
來謁請余誌之佛山固嶺表一大都會也控東西
省之上游四方商賈奔走鱗集乃其諸生獨閉戶
潛修絃誦自樂不見異物而遷焉宿學之餘類多
得雋以去故廣郡科第之盛甲於粵中南海科第
之盛甲於廣郡佛山科第之盛又甲於南海地靈
人傑或亦其形勝使然歟余竊考佛山圖經地本

鳳形鳳爲文明之象產是地者宜其有秀出奇偉
之材奮王路而登天衢以黼黻太平茲所建之文
昌閣適當鳳翅嘗讀卷阿之詩曰鳳凰于飛翾翾
其羽諸生之升華耀采其不藉此翾翾者歟故詩
繼之曰亦集爰止藹藹王多吉士惟君子使媚於
天子言愛君也又繼之曰亦傳於天藹藹王多吉
人惟君子命媚於庶人言愛民也諸生束髮肄業
非徒弋取科第從事於利祿之路而已必上之以
愛君下之以愛民講求實學爲天下國家之用夫
羽毛不豐滿者不可以高飛鳳凰非竹實不食非
梧桐不棲其立志之遠且大也否則鷦鷯之巢林

不過一枝斥鷃之決起止於榆枋豈余所望夫諸生者耶嘗恭繹

上諭諄命直省重臣頒行經史振興學校洵成周卷阿之盛際矣鳳凰鳴矣于彼高岡斯非諸生乘運而興雖雖喈喈之候乎夫文昌星在薇垣天文也

聖天子化成天下人文也以文明之曜臨文明之地而又逢文明之世余於諸生有厚望焉閣自經始至今已七年矣其在丙辰佛山之發解者爲談君德其在辛酉佛山之發解者爲陳君炎宗以三科而出兩元人皆詫爲盛事然此其乘韋爾嗣今以往人才蒸蒸蔚起凡馬翼孝德圭璋之聞望日出而爲

剛爲則以光輔我

國家四海九州羣仰佛山爲阿閣而以爲鳳凰之所
萃處焉豈不休哉

誥授奉政大夫廣東廣州府分防佛山督捕海防同知

加級天都黃興禮撰

乾隆十三年歲次戊辰仲秋穀旦立

已上
陳志

汾江義學增建求志齋記

汾江義學創自前司馬天都黃君堂廡庖湏綦備
遴聘儒宿以主講席數年於茲人文蔚起負笈而
來者溢於學舍振興之效畧可槩見予下車月課
諸生臨視慨然思有以廣之適有餞金乃於義學

右偏隙地復構講堂翼以廡廊顏曰求志亦猶黃君所謂讀書明理講求經濟實用之意以相勗云爾予涖茲土歲凡四更大吏調遣奔走之日多於撫理何異傳舍哉繼自今日益而擴之俾景慕之士不致於庠隘有造有德徧於鄉隅庶風爲近古予蓋有厚望焉

乾隆十九年二月吳縣毛維錡撰

重修流芳祠記

聞之忠可鼓勇義足動衆余每讀古見凡忠義之士其捍災禦患臨危制勝之烈績不盡乘權挾勢而乃克樹立也民不能忘馨香而祀亦不必銘鐘

鏞題竹帛而斯爲旌揚也丙子秋余調司茲土閱
鄉誌有忠義二十二老傳以明正統流寇黃蕭養
之亂于時寇挾排山倒海之勢憑臨我境會城師
旅固封疆而莫爲捍援乃二十二老獨以全鎮安
危爲已任歃血訂盟竭忠仗義破家財以資軍食
出奇計以陷強敵凡士農商賈有識力者靡不聽
其驅鋒冒刃而罔後我 北帝亦顯靈而陰助之
寇之排山倒海而來者竟兔脫雲奔而散全鎮獲
安其忠義良足多而智力尤特出矣余臨文慨仰
其爲人不禁勃勃生奇氣迄今鄉名忠義志不忘
也關號勝門紀其績也祠稱流芳揚其休也鎮之

食德報功亦盛矣哉茲己卯春季制府大憲李重
民生實積貯余建社倉于觀音堂後隙地因過流
芳祠日及傾頽荒蕪溯洄往烈悵然久之爰集保
耆後嗣考其故知安于頽俗而莫爲之理復稽其
嘗業幸猶有籍而易爲興乃以理論後嗣提當年
之租十五金以法繩當嘗舖者得十二兩以情感
獲利舖戶滿盈店義助二十八兩有奇其五十餘
金爲之經畫鳩工庀材頽者易之傾者植之荒蕪
者剔除而整齊之塗以金碧文以丹黃不匝月而
祠宇煥然擬吉迎神陳牲醴集衆以祀仰棟撫筵
之下二十二老之忠肝義膽偉烈英風儼乎如見

不禁肅我敬慕鎮之紳士商民及二十二老之嗣
裔其觀感興起又當何如也因紀其事勒石以垂
後董其事者典吏蕭超長班李長龍

乾隆二十四年歲次己卯夏仲穀旦南川王棠撰

已上采
訪冊

撥祠租給會課碑記

夫事有創之于前久而無容易者必其勢之可長
守也亦有創之前旋或變而通之者則其時之合
更張也惟不失創之之意而又有以永其傳則雖
起創者于今日應且歎爲寔獲我心焉爾吾鄉之
文章甚盛而社學之會課尤昭其始無恒式或疎

或數間又隳弛爰有李君公冕梁君翰章等創爲
久遠計于 靈應祠外築兩旁小肆二十餘間收
餽值以供課事蓋糾衆貲而成者時康熙癸未歲
也會課歲凡四舉以春夏秋之偶月循之至今垂
六十歲矣其擘畫措置洵大有裨于文事者顧天
下事有其舉之莫可廢也而或格于勢之所難行
黜于義之所當革則故轍難仍而機在善轉要使
美舉長存實有所藉以引于無盡此非識因時之
妙操易簡之術者不能易曰窮則變變則通通則
久其謂是歟夫前所築肆 靈應祠地也借祠地
而有助于鄉之人文 神之所不禁也今以修祠

之故務極宏麗不撤兩旁小肆胡以壯觀瞻而稱
鉅雄則盡毀而以地還祠葢勢不容已而義不得
緩也然則會課將由是而廢乎曰何可廢也前六
十載之有會課固資 神之地利矣茲宜仍求
神之終其惠俾多士世世拜 神之賜也余知
神必樂與而勿論也于是社中諸同人議歲割祠
租銀三十六兩以充課費輿情協士心欣殆善繼
昔人之志也夫夫神錫福于吾鄉至渥也錫福以
教思之無窮爲大 神若將其所有以仰贊

聖天子文治故創建義學歲糜七八十金皆于祠租取給
會課與義學同條共貫耳彼旣承給此亦宜然况

所給不及義學之半若尤簡而易行哉雖然社中
受神之惠固永賴矣而所以爲報稱者安在夫
乘此撥給之初毅然振起謹飭其規欵豐備其功
需庶可宣神德而光文壘乎若第循一歲四舉
之故事苟且塞責是委神貺于草莽也且前仗
小肆之租尙或有逋缺不及時之慮今則叩祠箱
而卽應視前更完便又奚爲不公愼以勳雅典哉
吾知淬厲日勤才華輩出當必有負閎博之望膺
絲綸之任者是神之大有造于吾鄉士也而始事
李梁諸君亦當默慶繼我者之善成其美矣此千
秋佳事不可不記諸同人因以見屬于是乎書

乾隆二十六年歲次辛巳冬十一月穀旦里人陳

乾隆二十六年歲次辛巳冬十一月穀旦里人陳

炎宗撰

崇正社文會規費碑記

原夫社學之名昉自前代按洪武八年詔天下立社學以教鄉社民人之子弟猶古之黨庠塾序也此佛山之有崇正社而社之會課所由興歟然亦未得文獻之徵不敢以臆度也若其人文之盛余則聞之夙矣今太史陳公雲麓家從叔篙師辛酉主試之拔解試畢假歸省親余方薄宦江左從叔以便過署道粵中人文之盛尤稱雲麓先生領袖羣英世居南海之佛鎮表望木天所可豫決當由

地靈所鍾云今春來泣喜邁斯文此非夙昔之緣
耶思揖多士分箋課藝以抒二十年來積慕乃甫
接篆上臺卽檄余董科務遽趨會垣未獲覘梗概
輒格格不是釋茲月之吉以假旋謁文帝廟壁
間張崇正社學會課榜見而喜召吏前詰以課之
起以創自康熙癸未對問其規向定二四六八月
之四日許已未進之文武與俱各給以紙亭午治
膳以供衡文者有潤筆優等則獎勵有差問費所
自出則鄉先達李公冕輩百二十人于社右靈
應祠前建市廛二十餘以歲入租稅爲資約可四
十餘金聞此歎規畫之善洵鼓舞人才培養之良

法何風之古也越日孝廉霍君偕同事諸俊彥進
詞以往歲重新靈應祠社中所捐之市舍悉撤
去以廣其前廊社學之租則于祠中之餘歲輸三
十六金歸捐建償用將勒珉垂後請記于余此與
余所問答較詳盡因思國家人材莫不興起于學
漢文翁之教蜀也教養兼至期于適用一時聲教
大洽比于齊魯唐州學生徒學成者長吏設鄉飲
之禮而薦送之韓子所謂歌鹿鳴而來也吁古人
之于學有如是耶他若鵝湖若安定遊其中者胥
趨于善卓然成材學之益于世豈細故哉崇正會
課自李公冕輩創義以還士之見用于世者鄉志

具在今霍孝廉復聯同志以綿其規絃歌之輟多
士濟濟南海多衣冠氣吾烏知其不爲佛鎮云耶
然則自今以往社之課肫肫日淳視前代所稱閭
里啓塾守令程課學士益知向方者更得稱便捷
收寔效將見日新而月盛論秀而升士之飛黃騰
達試禮部對大廷其才足以魁天下不于此社會
課基其始哉他日歸晤我叔亦得舉崇正會課良
規以告見佛鎮人文之盛有自來也爰樂爲之記
乾隆二十七年歲在壬午六月望浙江沈生遴撰

重修南海佛山靈應祠碑記

國家治隆化洽百神效靈雖村社田師亦福民而

享報况司天一之水稱北方之帝者哉吾鄉有
靈應祠厥祀北帝曷名靈應則以明景泰時
捍大患之故蓋眷護所由來舊矣迄今士庶殷繁
文物蔚盛倍加於疇昔非神之益昭其庇歟夫虔
於事 神用仰承

聖

天子敬

神之德意此固官是地居是地者之所宜爲

奚敢有圯弗修有美弗飾也哉駐防司馬趙公觀
斯祠之將頽慨然興修舉之志爰謀諸鄉之人士
僉曰願如公旨各輸其力合貲一萬二千有奇經
始於己卯之秋迄辛巳之臘月告成懽趨樂事殆
神之感孚者深歟其規度高廣仍舊無減增從青

烏家言也材則易其新良工必期於堅緻門庭堂
寢巍然煥然非復向之樸略矣門外有棹楔則藻
澤之棹楔前爲歌舞臺則恢拓之左右垣舊連矮
屋則盡毀而撤之但築淺廊以貯碑扁由是截然
方正豁然舒敞與祠之壯麗相配其聖樂宮及祠
右之觀音堂亦并修建圖整肅也於以揭虔妥靈
其庶幾與夫神之祠徧天下獨是祠邀
諭祭之典故錫福無疆久乃彌著神若藉以報春秋禮
饗之

休命也然則今之棟宇輝煌余知神必陟鑒安居以綿威

惠於是地焉爾抑余聞之神無不愛於人而予福

則量其可受惟慶。神之新其祠卽勉以自新其德則迓嘉祥而拜。神賜必屬桑梓之吉人且爲國家之良士此則司馬公之所厚期於吾鄉者而非徒以重脩侈雄鉅之觀也余曩修鄉志於祠事載之極詳亦欲鄉之父老子弟羣入祠而生敬隨發其仁義之馨香斯俗美風淳不負神之保庇茲何幸新祠之益有以聳其目也余竊忭焉會值事諸君以記言見屬遂欣然振筆從之爲次其槩以鐫諸石俾盛事傳於世世無窮云

賜同進士出身翰林院庶吉士解元里人陳炎宗撰

里人朱江書丹并篆額

乾隆二十七年歲次壬午季秋吉旦值事彭金祈
龔詔等立

重修汾江義學碑記

汾江固嶺海之名鄉也士生其中好學而多顯余
分符廣州駐防斯地聞其俗之秀而文也竊用爲
忭下車與諸生相見卽殷殷以勸學爲第一義諸
士咸有喜色若羨余之知所務者予因詢曰鄉不
有校乎對曰有義學一區在汾江之南前司馬天
都黃公所倡建也予領之遂親詣其處則見庭堂
軒敞羣房鱗整以是集多士講學洵得所矣獨是
建于乾隆甲子歲迄今二十三年閱時非淺漸就

圯矣講堂之梁蠹後室之垣崩瓦多穿漏門半朽
敗余喟然曰夫事創之于前不能保其勿壞在後
來者善補其缺耳爲低徊久之繼而屢課生童給
筆札具膳羞余巡覽終日益憮然不自安也爰進
諸士委以重修蠹者易之崩者築之穿漏者完之
朽敗者新之其費則出于 靈應祠歲辦所餘之

羨金凡三月告竣於是煥然改觀矣夫興廢舉墜
政之善經矧事屬教育所繫尤重特患絀于財之
無以應也余于 靈應祠祀事督令撙節刊落浮

冒遂歲贏百餘金此舉適藉以爲用不費士民一
錢殆 神所樂予而默相之余敢自以爲功歟抑

聞之士無寧宇志或緣之隙今堅緻完好居之安
矣架貯經史亦羨金購置足資討論矣諸士其尙
濯磨砥礪以仰副

聖天子作人之雅化他日炳炳琅琅蔚爲

國華汾江其大有耀與夫後之視今亦猶今之視昔
余踵黃君而有事重脩似不負黃君開始之雅志
矣迺歲月積邁則飭舊葺頽不重有賴于後之人
歟然則節無益以助教澤固涖汾江者所宜留意
也余有後望焉余有厚望焉諸士請書其事于石
因援筆揭其寔云

佛山同知祖承祐撰

乾隆三十一年丙戌孟冬吉日立

旅食祠碑記

王右軍云死生亦大矣豈不痛哉夫修短隨化終期於盡固理之常耳猶不能無痛况非常凶沴數百人殲于一炬可不爲大哀乎余于旅食祠之建愴然有餘痛也溯吾鄉以福地稱堪輿家謂四杰伏藏永無災劫故自宋迄今類皆康樂壽考人歌得所嗟乎去歲丁亥十月之異胡爲乎來哉夫會館演劇在在皆然演劇而千百人聚觀亦時時皆然迺顏料之會館顧獨蒙不測之災也釁發于祝融人迷于倉卒突前扉兮勿通奔後垣兮乏竅乘

屋兮下牽不得升入井兮層擠不得掉煙紛羅兮
哀號燄飛騰兮狂叫魂瞽亂兮失東西魄焦爛兮
無老少痛矣哉天耶人耶傷心慘目有如是耶仁
人君子能不思所以平羣憾而妥羣靈耶爲之塋
埋穴相枕也爲之懺薦斨同登也是足以平之妥
之乎未也同死者五六百人宛若携手同車携手
同行不得萃一室以處則煢煢其未安也爲之創
棟宇備堂寢俾旅居而旅食焉夫然後咸有所歸
也斯祠之立非惻隱所結撰而聯幽冥之情志也
哉助貲者旣動于不容已經營者尤力以肩其成
信吾鄉之多義人而恤災慰死之有合乎古也夫

天地之大德曰生而凶沴之來迺緣氣數是豈不
愛五六百命而付之一燼乎寔出偶然之氣數不
關人事也明矣况恤災爲迓福之道慰死爲保生
之基繼自今吾鄉人益勉爲善事庶俗美風淳世
獲吉護則永無災劫之說未始不信而有徵耳而
斯祠之享祀不與之長存哉當火之明日余寓羊
城鄉人以其事來告余方與客飲聞之驚悼遽投
箸而起客亦愕然變容欷歔感嘆因罷酒誠深痛
而大哀之也豈第如右軍所云尋常之生死哉茲
執筆紀所以建斯祠者猶痛從中來縈縈于楮墨
間也祠建于汾水南擎後街經始于戊子歲之正

月閏十月告竣深九丈八尺廣二丈七尺零門庭
寢室皆宏整旁築一軒亦爽潔庖厨灶井皆甃石
甃固楹棟構良可垂久遠其首事諸君暨捐助士
女姓名并列于左

賜同進士出身翰林院庶吉士加三級乾隆辛酉科解

元陳炎宗撰

乾隆三十三年歲次戊子十月吉旦首事國子監

太學生里人梁德滢等仝鼎建

重脩文昌宮堂寢碑記

南海之佛山鎮嶺南一都會也余忝分符廣州駐
防其地首留意于土俗竊歎其士民之好義而奮

于公也夫官典所貴者祝

聖壽宣

上諭居恆凜凜罔敢斃焉而佛山士民迺知以此爲第一
義非素矢敬慎者能見及此歟夫旣重其事則必
定厥宇倘匪軒廠整備之處未足以明虔鄉有
文昌宮在 靈應祠左夙稱宏潔以是爲釐祝讀
法之所亦云妥矣余下車之始心竊嘉之俄而彭
生金祈等以堂將圯宜亟脩來告余曰善哉是不
可緩也爰允其請且勗以鞏固未幾舉人霍君超
士等又以併脩後寢來告余曰事有相因而濟者
不亦善乎殆不容已也司事者其連歲修之以觀

厥成茲兩俱告竣矣余甚喜其公事之完美也蓋
前之請特葺已形之廢壞後之請則預救將形之
傾頽合堂寢而重新之煌煌乎偉觀也歟士民趨
赴之勤其曷可沒與矧是舉也出 靈應祠租羨
之項不費民間一錢又仍其舊而飭理之無絲毫
變易而已煥然聳人心目矣是豈徒 神之安其
宇哉予以頌

萬壽之無疆揭

聖訓之有典有則用知嚴庭堦而遙瞻

雲日庶幾乎肅視聽而共尙典型余且藉是以伸其儼恪

而士民尊親之誠亦於此著矣其有裨大義豈淺

鮮哉夫佛山五方雜處商賈輻輳而士民顧慕義
急公若是此涖斯土者之所樂與也爲忭慰者久
之適彭生等謁余請記其事余爲述其由來暨其
一再之勞瘁可垂久遠而有賴也付諸貞珉庶復
得以覽焉 佛山同知韓紹賢撰

重修汾江義學講堂碑記

汾江義學之建歷今四十餘年倡于乾隆戊午分
憲黃君諱興禮公祖捐俸以率紳士僉題又益以
靈應祠租共成此舉然是時雖延師教習尙屬權
借他所未有定在也至癸亥購地于廣德里秋入
月經始闋五月落成而義學遂廓然大觀焉自講

堂而書齋而厨而井而餘閒隙地布置有條由是
歌誦恒于斯游息恒于斯每歲不輟丙辰之歲分
憲祖君諱承祐公祖暨李君諱良翰司臺延予在

此掌教講習之暇嘗與生徒譬論升堂入室之語
而嘆斯堂之正大光明斯室之精微深奧鼎建之
功匪易也夫非堂則室無附非升則入無由故升
堂爲學人進步第一關茲之講堂亦義學要地第
一着也無講堂則宣教不肅課文無地顧不重歟
乃去歲庚子堂忽遭蠹傾頽未及修復今辛丑歲
承分憲王君諱煦公祖暨劉君諱方煦鄭君諱籽
兩司臺命復延予掌教遂權將麒麟社霍祠爲義

學而重修講堂之議亟亟乎于是鄉之正副及司
事紳耆諸先生體王公祖鄭司臺栽培後學至意
竭力從事將今年 靈應祠租餘羨之銀鳩工庀
材以復講堂之舊并于各書齋朽敝者葺之閱冬
初而告竣迴思予丙戌在此講學時堂固依然其
不爽室亦端然而未改重修之視鼎建寧多讓耶
繼自今我同人幸生

聖

主文治之朝各踴躍觀摩無負當道大人作養之深心

無負鄉中紳耆勤勞之美舉居肆以成事焉可也
鄉進士文林郎截選知縣義學掌教霍超士撰

乾隆四十六年辛丑仲冬立

重修佛山經堂碑記

山以佛名誌所自也名佛者何相傳晉代有西域僧至此結茅講經僧尋西還其徒因構室而居號曰經堂地據省會上游五十里僅南海縣屬一小鄉耳當鄉初聚時鄉人嘗夜見其地有光燭天乃掘得古佛三尊并有碣曰塔坡寺佛遂以供之經堂建塔崇奉因名其鄉曰佛山嗣是日益蕃庶自唐宋元明以迄於今人稠地廣烟火十萬餘家凡仕宦之所往來商賈之出入貨貝舟航之所聚集俱於是乎滙而且衣冠文物之盛幾甲全粵蓋駸駸乎海濱鄒魯矣丁未冬月余由西清奉

命佐守廣州實隸乎此蒞治後天旱須雨偕同駐防之都

閩張公

名

象履者躬謁各廟爲民祈禱見所謂經

堂者惟像與塔在餘皆敗壁頽垣但存舊址詢之
寺僧父老僉稱自雍正九年重修後踵事無人風
雨飄搖以致於是余不禁浩然增歎以興廢舉墜
爲司土者責况斯地爲佛山肇基勝蹟豈可聽其
久而遂湮耶且天下名都巨鎮與紛華富麗之區
雖曰氣脉使然皆莫不有神明之胄出其廣大肝
鬻之靈以維持默相於其間乃能永隆而不替余
攷之志乘佛山自明以逮

國朝甲第蟬聯富室櫛比近今數十年間科名殷戶

槩遜於前夫根茂實遂本撥末傷理有固然今不
昔若職是故耳都閩張公慨謂余曰若是則此地
之興修烏可緩哉因亟勸余力肩此舉無何奉委
解閩餉二十萬兩往返數月春初旋署張公復爲
余言余謬膺半刺事神治民職應分任夫何敢辭
特以斯地廢墜已久重建工費浩繁非藉衆擎慮
難猝辦張公曰是固易易積篋可以爲山集腋可
以成裘佛山一鎮紳衿商賈林林總總於尋常醮
會神功尙且不吝施予矧此舉爲地方興利官旣
樂爲之倡其生斯長斯與貿易於斯者亦誰不欲
其地之利而不爭先恐後者無是理也抑不特此

也佛山居省上游爲廣南一大都會其地運之興
衰東南半壁均所攸關是則經堂之建舉凡在粵
之宰官薦紳皆宜踴躍勤事其成美舉將見祇園
紺宇輪奐重新慧日照臨之下三江五嶺咸被休
光甯第一鄉一邑而已耶余聞而憬然旣而忻然
曰公言誠善余愧不能文不足爲誌諸君勸請以
是勒之於石以作重修佛山經堂緣起

乾隆五十三年歲次戊申九月朔日渤海居士葉

汝蘭撰并書

敬字亭碑記

字紙社之結屢矣皆不久而廢何歟無實業以贍

其工人無定址以稽其勤惰有名無實宜其興而復廢也顧自斯社廢字紙之狼籍於道旁益甚矣用再聯同志買屋爲亭買舖爲業業以資工食亭以居工人貯字紙時焚化今而後僱工有資勤惰可省凡我同人願皆顧亭名而思其義毋任他人擅踞毋俾承斯役者食其食不事其事則斯舉庶幾其可久也爰將簽題姓名及買置屋舖修改各費備刻諸石 一本亭一座三間正間闊二十一坑左右兩偏間各闊十三坑另左邊廚房一所闊十一坑深淺與本亭相齊右邊廚房一所闊十九坑深一丈亭前正中爲字紙爐左右兩廊各闊十

三坑本亭前至照牆外滴水後至后簷外滴水爲
界另舖一間在新安街北向深三進闊十五坑乾
隆五十三年用價銀五十九兩當官承買蒙南海
縣嚴父師太爺恩准給照調署南海縣正堂加十
一級紀錄十三次嚴爲遵批再繳等事現據五斗
口司詳解舉人勞潼等添繳承買佛山鶯崗茶菴
舖價六十兩八錢詳請給照等由到縣當批解到
銀兩兌收貯庫候給照勞潼等管業此繳在案查
本案菴舖先經徐前縣訪獲余天相等在該菴聚
眾燒香業經訊詳奉行將該菴屋示召變賣批解
充公續據該司批解勞潼等承買該菴舖價銀伍

十一兩貳錢到縣貯庫當經前縣查核價數短少批飭增估去後茲據該巡司補解前來合就給照爲此照給舉人勞潼吳廷招區宏緒等收執卽便將承買茶菴修建惜字紙亭其新安街舖屋一間修整租賃支給工人口食以垂永久該舖菴稅糧向在佛山堡一百十八圖十甲羅兆元戶內舉人勞潼等遞年遵照輸將如有別人爭佔菴屋許卽稟明拿究毋違須照 一修整亭舖二處磚石木料灰瓦工銀監碑連買屋舖價及房東置椅櫨各費共銀壹百叁拾柒兩捌錢柒分 一本亭除門首一廊以居工人其餘遞年務必租與人做書館

俾察工人勤惰其人必能留心督率工人者方得租賃其餘一切諸色人等不得借住亦不得批賃共實收銀壹百九十七員半 亭舖二處共該地稅四分收在 靈應祠戶內遞年附納

麥暉敬書

乾隆五十五年仲秋穀旦值事勞潼吳廷招區宏緒

劉東陽李憲邦等仝立

乾隆乙卯散賑碑記

昔人謂士大夫不貪官不愛錢而一無所濟於人畢竟非天生聖人之意李宏齋亦云凡人必不待仕宦有職事方爲功業但隨所到處有以及物卽

功業也至哉是言士君子能常服膺是言則物之

不得其所者寡矣憶乾隆戊寅歲佛鎮有賑飢之

舉潼時僑寓平洲未與其事顧聞而慕之迨戊戌

歲飢潼隨諸君子後稟官簽賑時始事以名入官

者十一人後襄事又多數人而事竣後詳憲給扁

獲旌者止五人同事者頗不平議顏一扁於崇正

社學盡載首事之名以示後余笑曰我輩欲爲陰

德若必求人知是陽德也事遂止迨丙午丁未連

年救荒中間因稟憲於闔鎮舖租二十取一散賑

而兼平糶審戶收租事務繁冗時共事者至數十

人後雖獲旌於當道而仍未能遍眾議立碑記之

而未果子乃甚悔前者陰德之言之恐或阻人爲善也且戊寅戊戌兩次賑飢皆巡宰王公

諱棠四

川人經理其事止爲之彈壓眾人部署進止而不

干預銀米之數又通稟上憲懇免稽核俾吾輩無所顧忌易於措手及乎丙午丁未所有簽賑平糶皆巡宰鄭公

諱耕浙江人

爲之經理一循王公之

迹時府憲張公

諱道源山西人

陰遣人覘伺適遇

廠中早膳見在事者儉於自奉且辦理井井有條張公聞而嘉之遽捐廉五百金發來助賑是皆大有造於吾鄉者也若俱不紀載則後之官斯土者何法焉昨乙卯復饑眾議照前事例簽捐收租以

復賑蒙署分憲王公

諱宿善山西人

邑尊李公

諱

樓

巡宰柳公

諱因材

皆捐俸爲倡刻日借社倉穀

出碾佈散甚速是年饑死者較少因賑能應時之故韓忠定云救饑如救焚信不誣也予常見開賑之日貧民多鳩形鵠面貿貿然來幾令人不忍觀迨賑至數日後菜色漸除欣欣然似喜氣溢於面足步亦輕健一時在事之人亦爲之色喜也愚謂卽此可以見天地之心矣至如袁黃所謂濟饑之人其後必昌屈指古今歷歷不爽翻似非當日趨事之時所及計也茲因以賑餘銀兩創立義倉工峻監碑并將簽賑及首事姓名泐石俾後有考焉

其自戊寅以下數次倡賑首事姓名雖難盡考然
遍訪眾所及知者一併附刻以爲人勸

里人勞潼撰

嘉慶二年丁巳十二月立

重修田心書院碑記

鄉前輩陳雲麓太史作忠義鄉志其凡例首條卽
云鄉爲都會地土僑錯處初無畛域之分惟君子
爲能通天下之志蓋必自同人於鄉始至哉言乎
人苟胸無畛域廓然大公可以同人於鄉卽可以
同人于國于天下易所謂同人于郊同人于野者
不外是矣我佛山鎮田心書院其始本僑籍人士

所建而鄉中士友課文多集於此於時卽不分土
僑雖異鄉人士亦咸會焉猶之崇正社學本土籍
所建而四季文課僑籍亦得與焉此吾鄉士風和
美也嘗慨明季社事之弊同已則私之異已則嫉
之雖至親昆弟苟不同社卽不免參商胸懷褊陋
至此居鄉如是欲望其立朝之無朋黨難已吾鄉
人士獨無此弊蓋能深體斯文一脉之意而一視
同人此所以人文蔚起而科甲勲名非他鄉所能
及斯亦和氣致祥之驗也院屢壞屢修舊碑可考
數年來棟桷垣墉間多朽蠹衆議開簽重修願捐
者不分土僑卽異鄉人士亦多簽助斯又本前人

之意擴而大之所謂通天下之志者此其基矣院
內舊祀 文昌帝君邇年增祀宋大儒先賢五子
猶有關係俾人此者咸知文與道俱道因文顯故
曰文所以載道也庶幾興起其任道之志而斯文
有賴乎經始于嘉慶二年六月落成于九月始其
事者給諫陳琬同先生倡之李庶常凝修及諸同
人和之肩其勞者則區子應魁葉子楚華唐子融
修暨子從姪作棟也潼愧與其名而未任其事工
竣眾謂潼宜記之潼固不得辭也抑子有說焉序
卦傳曰與人同者物必歸焉故受之以大有今書
院之修課文之會既能與人同矣尤望諸君子擴

其大公之量事事虛衷無我舍己從人戒荆公之
堅僻慕韓范之和衷居鄉如是居官亦如是庶幾
哉善與人同則斯世之豐亨豫大及聖賢之盛德
大業俱由此而可致矣所謂物必歸焉而所有者
大斯道斯民之任實有賴焉豈特文風日盛科第
蟬聯爲鄉國重已哉予蓋拭目俟之他日雖老猶
將弭筆而紀其盛

里人勞潼撰

嘉慶三年六月初一日重修值事陳其焜等立石

吉制府給發佛山田心書院會課支費并撥汾

書院膏火碑記

昔孔子爲衛謀保庶之策示以富教二端遂爲千古爲治之大綱其自一鄉一邑以至治國平天下率不能外乎此我佛山素稱富庶亦嶺海之間一都會也然前輩家雲麓太史作忠義鄉誌有云吾鄉謬以饒富聞而無蓄積之實每遇饑饉乏者輒數萬人饑寒切身不顧廉恥識者憂焉是庶則有之而富則未也邇年蒙列憲准建義倉收汾水正埠鋪租艇租隨時積穀以備濟飢之用雖未敢望家給人足之盛然凶荒有備庶幾得保庶之遺意茲又幸遇宮保大司馬制府吉公節制兩粵甫蒞任卽以化民成俗爲首務刊刻

聖諭廣訓到處張掛以訓誘愚蒙又命各學廣文遍詣鄉

落以土俗語解釋

上諭使人人易曉而于我佛鎮尤爲留意嘗以事到鄉傳

集紳士諄諄告誡委官擇端正耆民二十人賞以銀牌使之訓飭子弟復許令鄉中舉行鄉飲養老之禮俾後生有所觀感其教之也一何肫切歟吾鄉有田心汾江兩書院爲造就人才之地署郡司馬李君蒞任捐俸親臨課士因將佛山賭坊充公羨項請于制府給爲兩書院膏火制府旣允其請復以佛鎮煤廠充公白金二千兩爲田心書院生息課士之費餘以爲汾江書院燈火之資遂言于

方伯司寇觀察太守邑侯諸公無不贊成稱善公之惠及吾鄉一何有加無已哉歐陽文忠有云古之立學擇民之聰明者而訓焉使轉相告語勸誘其愚蒙然則公之課士其爲教訓計也可知已李君承前郡司馬滇南楊君之後而與之媲美楊君潔已愛民廓清盜賊民歌頌之至今李君能繼其武刻刻以弭盜安民爲事今復能體制府化民成俗之美意而爲惠於吾鄉人士如此鄉人士其何以報稱其萬一哉茲承制府命以書院會課章程勒諸石用垂久遠因奉公長生祿位於右奕室以李君爲配畧表葵誠屬予記其本末予前歲曾應

制府命忝爲粵秀書院山長近以老病逋休喜吾鄉有公嘉惠而未克力疾躬詣以謝心常歎焉故勉應鄉人之請粗述其槩以誌公之德於不衰抑愚更有說焉曾子曰君子以文會友以友輔仁愚竊謂鄉人士會文於此便當互相勸勉身體力行勉肩斯道之任他日者出則堯舜其君民處則儀型其鄉里務使姦究屏息禮讓興行海濱鄒魯之風復見此日則吾鄉富庶可以長保斯無負乎制府栽培及李君奉行之至意豈徒藉此以弋巍科躋顯仕已哉又豈徒尸祝俎豆遂足以仰報制府及李君之德於萬一哉予因不禁推明公之所以

屬望吾鄉之意以爲鄉人士勗云

里人陳其焜撰

嘉慶四年己未仲秋立

重修靈應祠鼎建靈宮碑記

儒者作事論理不論數而要事之成否則無非數也見爲理所當爲輒思奮然爲之然或格於眾議或絀於物力謀之而弗行行之而弗成直俟有力者倡其說而眾莫違括其資而人樂助而其事迄用有成是不謂之數焉不可也予自乾隆丁未歲乞假歸里旋蒙當事延爲粵秀書院山長鄉事概弗暇爲經理甲寅冬諸友向予言靈應祠祀

也丙辰正月望日公詣祠焚香向鄉人士曰廟修
自乾隆己卯於今三十餘年矣以起敬畏則神

將宜裝飾也以肅觀瞻則棟柱宜刮摩也墻垣宜
黝堊也捐俸金五十兩爲之倡命鄉人士董其役
衆因言於公曰前甲寅歲會議建靈宮緣其地

有數百年古樹人不敢議伐故衆志弗一兼乙卯
之春米價日騰遂寢其說今修靈應祠其并建

靈宮可乎公曰創別宮以隆享祀禮固宜然是烏可
以不建遂出示諭重修靈應祠及鼎建靈宮

諄切敷陳以此見公之留心風化也人凜公明示
靡不響應而神更式憑焉二月十四夜天大雨

以風廟後樹株大如合抱忽折其右偏折處如刀切狀中一株枯而復萌大已盈拱俱被壓倒數十工人睡廊下者一無所傷一無片瓦墮地眾共異之翌日恭行

諭祀鄉人士以告於公公往視曰神之欲建此宮也

其示諸此矣夫復何所疑焉聞之而往觀者殆不可以數計眾於是愈惕然於神之靈而倍加踴躍僉捐工費銀兩共九千七百有奇經始嘉慶元年二月至十有一月而落成余曰事之成也莫不有數焉此非其彰明較著乎是役也余雖廁名司事然鳩工庀材未嘗身任功不敢尸卽日有事於

程材課工者亦不自以爲能咸曰楊公能成民而
致力於神神罔怨而罔恫也民奉令而承教也
微楊公之力其奚能爲此也繼自今入廟而覩金
碧之輝煌觀瞻肅矣敬畏起矣宮分前後體統昭
焉倫理正焉尊尊親親之義明矣楊公之功亦偉
矣哉爰悉書之俾鐫諸石

里人陳其焜撰

里人李可端書

嘉慶二年丁巳仲冬立

重修佛山書院碑記

皇帝御極二十四載寰宇清謐文教蔚興山陬海澨講舍

相望絃誦之聲相聞罔不篤志稽古研求實學冀
爲當世用佛山固南海一鄉也衣冠士族環居萃
處其子弟類皆穎異秀出能承其先緒以故甲科
冠一邑余蒞斯土三載民靖盜息幸際無事鄉之
人士合辭來言曰佛山之有書院前司馬楊公楷
以舊地卑濕卜宅遷建今十有八年矣惟是創造
之始規制未宏又历年所摧墮及之大懼無以崇
德廣業琢磨有成爲邦家光夫興教勸學固有司
責也余心藏久矣第書院之前地甚隘民設蔬果
以鬻噫喧囂如市肄業者恆患其擾爰先捐俸金
五百兩買地建照壁于前繚以周垣左右置二門

出入經界既正觀瞻壯焉於是鄉人士若民忻忻慕義樂輸恐後工費不擾版築斯作經始于是年春落成于十二月之望自門徂堂齋舍庖廡畢具端序輪奐觀者動目煌煌乎較舊制加善矣今夫學校者王政之本也鄉學者造士之原也成周盛時家自爲教人自爲學凡飲射讀法之典皆于鄉是舉而又有鄉大夫州長以時書其德行道藝而賓興之故風俗厚于閭里而人才足于王國今多士幸生

昌明之日又居海濱鄒魯之邦講勸有舍修息有所將見經明行修者舒翹而競秀接踵而繼起上以

仰慰

朝廷崇建人文之德意下足紹先聖往哲之風聲于
無窮則斯地也且將與鹿洞睢陽比烈又豈徒今
日之規模已哉因書以爲之記

佛山同知華亭王繼嘉撰

嘉慶二十四年己卯十二月立

重修佛山海口 文昌閣記

天下之祀 文昌以求福衆矣顧神明之舍不辨

崇奉之儀不至神且弗歆烏乎福吾粵佛山之東
南海口有閣以祀 文昌建於乾隆七年迄今九

十餘載譚形勢者曰此文星也宜乎舉甲乙科登

顯仕者歲不乏人道光乙酉二月余備藩黔南鄉
之人郵余曰閣且日圮眾議釀金三千兩有奇鳩
工庀材因地勢所宜而增高之屬記於余余捐廉
襄工以復曰萬物相見乎離而齊乎巽巽東南也
其象爲風九卦以風行權居高則令可布也其方
爲巳十二辰以巳爲文非高則文不耀也 文昌
斗戴匡六星文者精所聚昌者揚天紀輔拂並居
以成天象而貴相理文緒司祿賞功進士意者其
顯鑠昭著萬古如一日乎今仍其方位則神明之
舍妥矣隆其棟宇則崇奉之儀著矣佛山爲省垣
西南重鎮四面環海氣運所鍾商賈輻輳人文奮

興於今爲盛四方之遷者僑者從學而來者宦成
而歸者權緝竿以起家者執藝事以自食其力者
咸以風淳俗美鄉有賢者梯航簞笈鱗萃雲集偕
來而卜居焉今閣之修也文明之氣高轟東南上
通斗極光焰萬丈蒼茫迴合下澈海水而香烟燈
燭復與虹梁蛤戶沙碧雲青五色十輝互相映發
厥文彌彰其將有躋三台魁多士者出乎其間以
應

聖天子作人之運歟抑又聞之道書以 文昌帝君一
十七世爲士大夫在周曰張仲詩曰張仲孝友吾
願與諸君子敦錫類之仁求篤慶之本各親其親

各長其長庶幾風愈淳俗愈美毋戾神之教以
迓庥福於無窮也是爲記

里人吳榮光撰

道光六年丙戌四月督修里人方鈺等立石

清濬佛山涌港記

涌泉之涌嶺南方言讀爲衝音蓋涌字之訛或云
涌滿或云涌出實水之支港也歲甲申余備藩黔
南謁程中丞屢及其在粵藩任內檄飭佛山濬涌
事越歲乙酉涌段爲蔗圍村民占築阻濬尾閘官
已白案其冬制府阮宮保師行部舟過佛山登岸
閱視紳士以蔗圍村衆素強橫恐復爲所阻嗾嗾

面訴制府曰阻者來一名則執一名以至百十名
盡執送官官有案無恐於是鄉人感制府之威德
而重思程方伯之始事也屬余爲文記之按涌自
新涌口入佛山鎮周環三面至柵下文埕入海袤
長二千八百三十丈衡自十三丈至三四丈不等
士大夫以爲文脈商賈以爲財源而藉餘瀋以灌
田畝通舟楫以便行旅其尤彰明較著者也顧歲
久湮塞嘉慶二十一年李茂才榮邦就其所居觀
音堂一帶清濬四百餘丈以費絀而止道光元年
佛山都司今任潮州總兵蘇君兆熊與佛山同知
徐君維清倡率閩鎮紳士商民捐輸助工得洋銀

九千九百兩有奇諮詢李茂才清界址選值事以十月經始至二年冬將底于成尚餘十一段與在文埕前坦之四段復因費絀停工而蔗圍村民遂藉前與鎮內所買文埕前之北坦田附近涌尾毀界占築橫障下游四年奉官牒催葺工在事者以前情稟案由縣斷令蔗圍所買之北坦田照價收歸鎮內勘拆宅濬在事者聚商闔鎮矜耆按照碑刻舊章哀義倉買谷羨餘銀二千三百兩以爲濬餘段之用而工以竟於戲佛山爲粵之一隅耳清涌爲佛山稍重之事耳而百十年之淤者經幾番籌畫一旦始通非阮程二公之督成蘇徐二君之

經始曷克至此余過新涌口至棚下見一水如帶
與潮汐相消長行舟利涉農田深耕慨然謂鄉人
曰向之淤者以圖小利而占也以憚掃除而積也
夫圖小利則貪憚掃除則惰貪則衆惡所歸惰則
於己並有不利也自今以往念成事之不易勿占
勿積將以此水爲六門之堰三坡之渠與居人行
人長享千百年之利豈不懿哉是爲記

里人吳榮光撰

里人李可瓊書

道光六年丙戌八月立石

南海吳氏方伯家廟記

道光乙酉秋

榮光

備藩黔省以先通奉府君年屆

七十五

榮光

違侍十有六年告於長官援京官給

假四月之例陳請歸省越月奉

命護理巡撫復具摺奏達得

旨俞允十二月二十六日抵家省覲府君欣慰交集既

復進

榮光

與諸弟而詔之曰汝等承祖宗積慶以

有今日汝

榮光

通籍二十有八年位至二品汝彌

光舉秀才復以詹事主簿通籍汝綬光亦仕進有

階吾聞守其宗廟爲卿大夫之孝佛山居人稠密

未易得地汝生祖妣易太夫人爲汝祖側室族議

不祔翰林家廟歲時止祭於寢吾心歆然宅西家

塾外爲澹和堂寢室饗堂之基已備仍其式廓而

修葺之爲我七房家廟上祀汝祖玉堂公及祖妣

黃太夫人次及生祖妣易太夫人次及汝母梁夫

人其庶母鄧孺人及汝榮光前婦羅夫人等以次

另龕祔於兩旁俾神有所依是在汝等汝榮光居

官清約廉俸之入未遑多及將來析爨時留祭產

外垂光燦光等若已授室則所得全給之若未授

室則其名下分業仍歸公家轉息歲給口食尙有

餘費可充公用也榮光等謹泣而誌之蓋榮光不

肖不能長侍膝下府君以簡書可畏將勉其復出

遂不覺其言之詳且盡也於戲不料其言之旣詳

且盡也越兩載戊子夏

榮光

在福建藩使任內倉

卒奉諱歸大事既畢合諸弟而謀之曰先人遺命不可緩也遂以己丑九月經始以家塾作寢室以澹和堂作饗堂其冬底於成以十二月十三日諏告府君立七房方伯家廟恭奉顯祖玉堂公祖妣黃太夫人生祖妣易太夫人顯考通奉府君妣梁太夫人栗主告安寢室正中神櫥以庶妣鄧太孺人及先二弟超垣先四弟寵垣安於左旁前室羅夫人及故媳嚴安人安於右旁神櫥並遵

大清通禮二品備春夏秋冬四祭以四仲月初吉舉行承先志也其廟前廳事三楹內向則以爲祭日會

餽及歲時薦新朔望獻茶兄弟子姓集聚之所凡
一几一席一花一木皆府君數十年手澤所貽敬
謹留存將使後之人依慕撫摩識勤儉之意增愾
憫之思也若夫

國朝品官家廟定制二品得用五間三門茲爲地所
限廓而大之以俟來日其祭產及一切章程另泐
於石

道光十年歲次庚寅秋八月吉旦吳榮光立石

南海吳氏

賜書樓藏書記

余性好書籍官京師二十年聚至七八千弓後以
嘉慶己巳鐫秩閒居去其半以易米最惓惓不忘

者宋拓化度寺碑范氏書樓原石本宋板史記及
陳後山集也嗣外擢出京以館閣通行易得之本
悉贈友人嗣在閩省建鳳池書院以重複者二千
二百餘弓捐置院中蓋三散矣然余歷走陝閩黔
浙十年廉俸所入短衣縮食以購之閩浙多藏書
家余兩蒞其地所得尤多道光乙酉冬在黔藩任
內告歸省親除寄存杭州方芑田孝廉家外檢篋
中金石簡冊將及二萬卷悉携以歸薏米之謗不
足計也丙戌北行戊子夏在閩藩任內奉先通奉
諱遄歸大事旣畢偶閱曩存卷帙半爲蠹蛀嶺表
卑濕思有以保護之因以建立家廟餘工於宅後

購西隣區氏屋地作樓樓中敬貯

先帝所賜上方善本餘則仿方漸增壁爲閣故事將二萬卷盡列兩旁閣上却儻蟬登爽塏統名曰

賜書樓記

恩及也廬墓歸來或與家園羣季指函數典或獨手一編

終日忘倦始覺向者之未嘗學問徒躡科名自今所得爲已多矣浙中寄存之本行當附海船載至續有所得當增益之後之人知有張茂先三十乘之載不可悔沈攸之十年之讀蓋藉以博古知今持躬應務匪細故焉余之貽厥謀者惟此而已尙其保之勿失

何山志卷十二
道光十年歲在上章攝提格斗指亥之月拜經之
日南海吳榮光伯榮甫記并書

重修佛山田心書院碑記

田心書院者始於康熙八年佛山僑籍士人建以
祀文昌暇則於此會文焉地環以田故曰田心
顧院無經費會文者凡一紙一茶一麵及獎賞所
出歲捐貲以取給焉盛時會者至四五百人每十
數人主一會歲則二十餘會會弓卽日交主者受
越宿則不受受則彙送鄉先達定甲乙魁者獎制
錢百餘以次遞減粵中論文者至不敢輕闕田心
會文謂此固文章藪澤恐去取稍苟貽笑大方此

余自乾隆辛亥至嘉慶戊午與會八年所及見及聞者也嘉慶四年己未覺羅吉有齋協揆督粵時以煤廠充公銀二千兩發交紳士吳陳兩家置舖產入其租息作每歲院中會文獎賞之費自是院有經費而弊反由此生矣佛山多學館使每館月主一會則受弓者越宿可受也越二三四宿亦可受也越宿可受則館中人能窺別卷之文有佳者或剽竊其一段一股一對潤色其文以博取前列也又其甚者館師擅加評閱定甲乙僞押先達印章以誑人又其甚者所僞印章其人早已作古而莫之知也於是文人學士以赴院會文爲戒以會

文前列爲辱院中盛會久爲數學館之童蒙所據於戲協揆之愛士甚殷而士之報以弊者愈烈此又余於道光丙戌

予告歸省時所及見及聞而心焉傷之無可如何者也歲戊子余奉先通奉諱遄歸大事旣畢見院中棟宇朽蠹墻垣傾頽爰集同人捐助得銀一千兩有奇選廢材之可用者佐以新料於祀神正殿左右畧加高深墀植桐槐二頭門旁添設兩便門院左右增置房一間小廊一所院外築月池沿砌石路費稍不足續捐得銀二百兩將底于成適鄉有官封賭博房產五所例應充公余請於督撫兩院

撥入院產以歲息增獎賞總督李鹿坪尚書仍恐不敷復捐銀一千兩置鋪房三間現歲租六十四兩零合撥入及吉協揆捐置鋪產共得租息銀叁百六七十兩余慨然曰是可以復舊章而防來弊矣當房產未出租之前院工落成余以庚寅二月捐廉邀同人會文於院得文一千二百餘卷擇其尤者梓以問世既乃集衆公議將本歲原租及李尚書捐未置產一千兩之息銀自初會起加增獎賞魁者洋銀一圓餘亦每名照舊數遞增越宿以卷至者峻却之每會至三四百人會日余曳履至院門前與二三老友稽古論舊悠悠往事越三十

餘年余獲復覩曩昔會文之盛心以慰矣因語學
侶自巳未以後院中諸弊叢生者無專責無稽查
也今以明年爲始設司事一人以專其責歲舉六
家輪流稽查絕覬覦而計久長庶幾無詐無虞四
方人文聞風而來者日新而月盛於以切勵道藝
砥礪廉隅以上應

當代文明之治他日紆華金玉翬羽風雲必有因余
言而重思吉李二公者衆曰然請記始末於石
道光九年歲次己丑十月里人吳榮光撰

重修佛山汾水 關聖大帝廟記

聖人爲萬古扶世翼教而其威靈所著尤莫盛於

顯忠遂良之代大之則激忠義而捍災患小亦彰善惡而厚風俗余自通籍後伏讀

列聖詔旨敬記 關聖大帝護

國庇民之大者二事一則嘉慶十八年平教匪案一則道光八年獲逆苗張格爾案均於杳冥不可測度之際特見 神威電掃風馳么麼立靖

朝廷屢加封號載入 祀典煒矣哉千六百餘載以來大義孤忠炳靈宇宙而於我

朝崇奉愈隆昭格愈著豈不以

太平之世所以激忠義厚風俗以保此

萬年有道者 帝心如天天之所助者順耶使天下之

人尊

朝祀仰 神威自大邑通都以泊山溷海溼奔走讐

慄如鑒如臨承事於靡遺也稽 帝致曹操書有

曰日在天之上普照萬方心在人之中以表丹誠

及其斥吳人則有神隨天帝縹緲下鑒人世順逆

忠邪若者福否者禍令萬古知有大丈夫湘江漢

水之人異日當仰望我九天之上之語於戲剛大

之氣浩然沛然孟子所謂配道義塞天地迄於今

仰望者豈但湘江漢水也吾粵佛山舊有 帝廟

創於順治八年厥後遞有增廓計自嘉慶十年重

修後至今又二十有六載地枕江干沙水所蟄墻

基柱礎漸就傾圯道光庚寅正月里人倡議重修
捐輸麤至得銀一萬一千餘兩添購廟旁梁姓掛
草街舖地兼葺廟後華光殿大慈閣經營揀度越
八月告成棟宇用壯金碧交輝蝸蝓夔夔之中

神實憑焉夫佛山自前明里社同心捍賊以忠義
名鄉生聚日蕃風俗日厚今鄉人又能知作善降
祥之理事 正神以求福無慚衾影各凜旦明將
見忠義之氣毓爲嘉徵貨隧駢羅民居康阜以遵
道遵路爲忠以睦姻任卹爲義庶幾罔怨罔恫千
百年承 帝之休於無斃也是爲記

道光十年歲次庚寅九月里人吳榮光撰

法帖

筠清館法帖共六卷南海吳氏家刻石在大樹堂
內筠清館第一卷晉王羲之樂毅論黃庭經霜寒
表快雪帖告姜道等六札頭眩方曹娥碑王獻之
洛神賦十三行衛恒王珣王濛梁羊詒及無名人
書第二卷唐太宗秀岳銘唐臨蘭亭序殘字唐臨
二王帖薛稷洎槃經殘字張旭千文殘字懷素跋
唐人書藏經殘字第三卷宋太宗書崔灝詩宋徽
宗祥龍石詩梅竹文禽御鷹圖題字蔡京跋宋高
宗詩宋范純仁告身第四卷宋蔡襄茶譜叙黃庭
堅書弟子戒米芾詩札宋薛紹彭詩吳說札吳琚

碎金書張卽之札第五卷元趙孟頫書洛神賦及
札鮮于樞書歸去來詞倪瓚詩札樊士寬書方叔
淵詩錢良右札蘇過書馬治詩倪駿詩錢壁札楊
遵臨張伯英王逸少柳誠懸帖第六卷元王叔明
聽雨樓圖內元十五人題識元人蘆鴈圖內元七
人題識帖內真蹟及宋拓專行本及宋拓絳帖鼎
帖紹興米帖閣古堂帖羣玉堂帖卽閣古堂所改英光堂
帖各種皆吳榮光出自家藏及借自戚友家集成
之各帖經前人已刻者因所自出之微有不同或
舊刻偶有錯悞校正重刊其餘多世所未見之書
帖首筠清館法帖第幾帖尾道光庚寅夏五月南

佛山忠義鄉志卷十二
海吳氏摹勒上石等字皆篆文

吳氏定武蘭亭帖嘉慶辛未里人吳榮光借商邱
陳氏宋拓五字損本手自模刻閱八月乃成有成
親王及錢樾阮元英和覺羅桂芳等跋石在筠清
館